

四明談助目錄

第二十本

西外護  
慈鎮定

鄭四十五

西外護上錄西四明歷餘上至鳴鶴鄉慈邑境古跡提綱

鳴鶴山述成化志曹志 杜湖 白洋湖俱述曹志

鳴鶴鄉虞氏附新按列都尉翻 常侍喜 秘書丞預 侍

中荔 大中大夫寄 文懿公世南 進士九臯諸傳錄

句餘土音虞氏古跡五咏述曹志沈孝子傳

杜洲童氏列知府居易 縣尉金二傳 杜洲六先生書院

錄鮎埼亭集記

磨石山 浪港山 觀海衛 松浦俱述曹志附新按

四明談助

卷四十五

目一

五磊山 五磊寺 五峯山 五峯寺俱述成化志

石柱山 石刺峯 浮鰲山 縣後湖 八面山俱述曹志

慈谿縣述曹志 縣學述曹志

大隱山名句章 溪名慈溪 漢大里黃公 董孝子黯

吳越林無隱 宋楊適杜醇諸公傳俱見第二卷大隱山

下後列宋名賢馮制 張慮 孫夢觀 顧主簿 元烏

本良 烏斯道 明向樸 楊子器諸公傳

三孝鄉以董張孫三公名述曹志張無擇孫之翰二傳 城

東王孝女錄南雷文定記

大司成坊陳氏錄祭酒敬宗曾孫主事文謨連傳 靈應廟

牡丹述曹志祥異

東鎮橋姜氏錄 僉事國華 給事應麟 御史思睿 編修

宸英 知縣宸萼諸傳

西鎮橋劉氏錄 太僕卿振之 明經應期二傳

德星橋 永明寺述 成化志 聚奎堂相術述 曹志逸事

三元坊楊氏錄 知縣孫仲 贈公世思 詹事守勤諸傳

司諫坊孫氏錄 都御史懋 提學成名二傳

縣南馮氏錄 禮部郎涇 大司寇岳 太常卿若愚 都御

史元颺 大司馬元颺 太僕卿元颺 御史京第諸傳

附 高中丞弔馮少司馬詩一首 勾餘土音詩二首

宮保坊姚氏錄 尚書鑠 修撰涑二傳

驄馬橋王氏錄 大司空來 詩人淮二傳

四明談助 卷四十五 目二

闕峯山 闕相祠俱述 曹志附 太傅澤傳

普濟寺 龍虎軒俱述 寶慶志

普濟湖卽慈湖述 寶慶志 金沙岡 四景亭錄 楊文元公

詩

慈湖楊氏 老楊先生庭顯 文元簡二傳見十八卷碧沚

下 茲錄 通判恪 徵士芮 縣丞伯成 知縣圭 隱士

淡諸傳并 慈湖書院記 山長葛魁傳俱述 曹志

石坡桂氏錄 學士萬榮 修撰錫孫 教授同德 正字彥

良 中書慎 紀善全 古香先生瓌諸傳 石坡書院

錄 結埼亭集記

花瓶山述 曹志附 新按 清道觀 蓬萊軒俱述 曹志

花嶼湖 述 曹志 休休亭 述 曹志逸事

東鄉龍怪 青蓮聖跡 馮次牧天益山房 俱錄 曹志

塔山 管山亭 鄮山 驃騎山并廟 神庇馮孝子事 述

成化志曹志

靈山保國寺 述 成化志 附 新按 文溪文大夫故里 錄 聞志

傳并贊 附 鮎埼亭集辨

文溪顏提學第 錄 提學鯨傳 李礪 述 曹志 附 新按

青林渡寶慶寺 錄 黃東發觀音殿記

雞鳴山 述 寶慶志 雲湖慶安院 述 寶慶志 錄 文學馮輓詩

大寶山 述 曹志 附 新按 大寶泉 蒙亭 述 曹志

西郭劉氏 錄 兵部世龍 知府安 副使志業 孝子悌

四明談助 卷四十五

目三

少司空憲寵諸傳

西郭趙氏尚書文華之後 錄 曹志殉難僉事珽傳

鳧磯驛 述 曹志 錄 句餘土音賦房太尉詩 鵬山塔 述 曹志

長溪嶺 述 成化志曹志 附 新按 資西寺 述 成化志 附 新按

雙頂山 勾餘村 述 成化志 錄 曹志袁相國煒傳

慈邑江南諸山爲四明發脉支隴已詳第二卷 文亭前後

江諸勝已詳四十二卷

江北泥橫山 述 曹志 附 新按 大忌山 述 曹志 向頭山 述

寶慶志 後海塘 述 曹志

遐追山胡劉二義士廟 述 鮎埼亭集碑記 并 勾餘土音詩

香山 香山寺 錄 圖經參曹志 并 南雷文定香山寺志序

後海頭沈氏錄 侍御履祥 閣學宸荃 知縣崇瑜諸傳并

勾餘土音詩二首

大蓬山述 寶慶志 鴈門嶺述 曹志

卷四十六

西外護下 錄雁門嶺至鎮邑境伏龍山至定邑境古跡提綱

龍山所述 曹志 澥浦 澤山述 成化志錄 黃文潔公震

教諭叔英 隱君玠 場官純裕諸傳 澤山書院錄 鮎埼

亭集記

梓蔭山 印山述 曹志附 新按 鎮海縣 鎮海學 魯國

孔林碑俱錄 曹志

宋理學名賢錄 曹長史粹中傳并 曹放齋詩說序 沈端憲

四明談助 卷四十六

目四

煥傳 余太師天錫并弟 兵部尙書天任傳 蔣員外傳

明名賢張侍講信 薛恭敏三才弟 文介三省傳并 薛

氏義門按

邑內古跡 海晏亭 石刻廉靜字 銅壺滴漏俱述 曹志

逸事陳御史因夢決獄 王穎令得蘭亭古版俱述 曹志

天倪生服丹仙去述 鮎埼亭集

鎮邑江南諸山俱東四明太白脉已詳第四十卷 下詳邑

東西并江北諸境

黃崎江 千丈塘 施公山 伏龍山 後海塘俱述 曹志

清水浦 大澗渡 城外石塘俱述 曹志 巾子山述 寶慶

成化二志附 新按 張太傅祠堂錄 鮎埼亭集記

候濤山述 寶慶志 水操採 夢憶 仙人洞 鐵牌和尚述

曹志 乾元宮述 成化志

招寶山鐵符錄 鮎埼亭集記 招寶山遊記採 楊文懿公集

并採 謝臯羽 宗正菴 盧月船諸公詩

觀海樓 威遠城俱述 曹志 下詳伏龍赴海至定邑諸境

岱山述 曹志附 新按錄 勾餘土音陳大令岱山操一首

雙頭洞山 秀山 黃楊尖山 馬畧山 岑港俱述 曹志

紫微尖山 雙髻山 鎮鰲山 定海縣 縣學 總兵府

俱述 曹志

昌國舊學錄 清容居士記又記 蘓東坡送馮判官詩一首

翁洲書院錄 鮎埼亭集記補錄 翁洲近代孝義傳

四明談助

卷四十六

目五

城中古跡 御書亭 文昌宮 芙蓉洲俱述 曹志 高昌

帖侯祠錄 勾餘土音詩 狀元橋述 曹志 舟山宮井

寓生居 雪交亭俱錄 鮎埼亭集記并錄 董次公宮井

雪交亭 哭舟山死難諸賢詩

關山 觀山述 曹志附 新按 道隆觀採 程篁墩集并 程史

錄 勾餘土音詩

定海關渡 南雷頭山 九節龍潭俱述 曹志

甬東山述 曹志并錄 沿海十六畧名目 下詳沿海名勝

萬壽寺萬壽蓀錄 成化志并 句餘土音詩 灌門 黃大洋

灌門砥柱 吳家山俱述 曹志

翁山 徐偃王廟述 寶慶志 舟山述 成化志 舟山獲白

鹿述 曹志

鼓吹峯述 寶慶志 曹志 金旗山 沈家門山 烟墩山

大小竹嶼山 雙鴉山 平巖山俱錄 曹志

明季殉節諸臣錄 孫閣學嘉績 熊閣學汝霖 沈都御史

廷揚 張相國肯堂 劉將軍世勳 吳尙書鍾巒諸傳

又董給事志寧 楊吏剖思任 戴工部仲謀 錦衣爾

惠四公分見各居第下不再錄附錄 張忠烈公詩一首

錢蟄菴詩一首 李杲堂詩一首 勾餘土音二首

同歸域述 曹志錄 松江姚椿弔同歸域文一首

西大洋三始山述 寶慶志 長白山 馬目山俱述 曹志

金塘山述 曹志 葛仙峯述 成化志 册子山 瀝表嘴

四明談助 卷四十六 目六

山 瀝表門 螺頭門 大螺放光 大榭山 竹山門

摘箬山俱述 曹志

東大洋衢山述 曹志附 新按 十二峰述 成化志 曹志 衢

港洋 長塗山述 曹志 東霍山 蘭山 劍山述 成化

志錄 句餘土音趙參軍詩

石弄山述 成化志 曹志 梁鴻山述 曹志錄 句餘土音詩

白沙山述 曹志

馬秦山 歇轎巖 蓮花峰 安期洞俱述 成化志錄 句餘

土音詩 桃花山龍潭述 曹志錄 元吳萊古跡記 香火

礁述 曹志 烏石塘述 寶慶志 紀異 六橫山 馬蟻山

錄 曹志 終于江浙界馬蹟黃龍盡山錄 海國聞見錄

四明談助卷四十五

西四明外護自太平山落洋歷上虞餘姚二縣至慈邑境至雁門嶺交鎮海至伏龍山渡海起舟山以沈家門出入水道爲界茲先錄鳴鶴磨石浪港五磊五峰石柱浮鰲諸山結縣治縣治北爲石刺嶺八面山縣治南爲學宮前後左右有歷代名賢古迹邑外自北而東南有闕峰闕湖普濟寺慈湖書院石坡書院花瓶山清道觀花嶼湖湯山塔山管山馬鞍山文溪李磬青林渡自北而西南有仙雞山雲湖大寶山鳧磯驛鵬山塔長溪嶺資西寺雙頂山幹脉自西北而東有泥橫山大忌小忌向頭遐追香山達蓬山雁門嶺等蹟所有事物詩歌隨地並詳于後

四明談助

卷四十五

一

鳴鶴山

縣西北四十五里父老相傳昔有鶴栖此山一旦飛鳴冲天上有黃文潔震墓志成化慈邑西北六十里一云唐元和間虞九臯字鳴鶴第進士鄉人尊之因以名其所居一云形如鶴翅舒而喙張有飛鳴之狀故名之舊有鳴鶴場鹽課司署久

圮曹志

杜湖

縣西北五十里古有湖址唐刺史任侗重加浚築漑鳴鶴一鄉之田號第二重天宋慶歷初主簿周常募衆築隄修閘爲利甚溥著作郎倪思爲記歲久碑不存並湖奸民破隄洩水民甚病之明萬歷三十三年令潘汝楨復修隄捍水碑記存



焉

曹志

白洋湖

縣西北六十里唐景龍中餘姚縣令張辟疆修築

成化志

與杜

湖相連西界餘姚姚民田於淺渚者侵湖殆半明隆慶間令

吳道邇重清二湖邑人顏鯨爲文記之

曹志

鳴鶴鄉虞氏

慈邑大家居第最古而可攷者惟鳴鶴虞氏故脩錄之餘則概從其畧

虞翻字仲翔少好學有豪氣孫權時爲騎都尉數犯顏強諫權不悅又性不諧俗多見謗毀坐徙丹陽涇縣呂蒙圖荊州請翻自隨料敵多奇中權爲吳王宴羣臣殿上自起行

四明談助

卷四十五

二

酒翻佯醉伏地不肯持權怒欲手刃之大司農劉基抱權諫得免翻性疎直又數有酒失權積不能堪遂徙翻交州講學不倦門徒常數百人嘗云自恨骨體不媚獲罪犯上當長沒海隅以青蠅爲弔客使天下得一知己足以不恨其自信如此在南十餘年年七十卒翻十一子第四子汜最知名孫綝迎立瑯琊王休未至將入宮圖不軌百官皆失色汜獨極諫綝不得已卒立休後爲散騎常侍以討扶嚴功拜交州刺史冠軍將軍封餘姚侯

詳曹志

虞喜字仲憲少有操行博學好古諸葛恢臨郡屈爲功曹察孝廉州舉秀才司徒辟皆不就喜前後辭辟命者凡九視時事若無與者然國家有大典禮不能決特使就喜決焉



喜專心經傳旁及讖緯諸書凡數十萬言行于世

詳曹志

虞預字叔寧喜之弟少孤好學有文諸葛恢庾亮交薦召爲丞相行參軍兼記室除左著作郎蘓峻之亂太守王舒請爲咨議參軍峻平進平康縣侯遷散騎侍郎常侍領著作如故預所著會稽典錄二十篇諸虞傳十二篇詩賦碑咏等復數十篇

詳曹志

虞荔字山披幼聰敏有志操及長博覽善文梁武帝置士林館荔製碑上之帝命勒文館中仍用爲士林學士侯景之亂荔率親屬入臺城城陷遜歸陳高祖代梁以荔栖遲東土無仕宦情遺書勸其至都文帝復書促之荔不得已應命文帝素重荔常引置左右朝夕訪顧荔沉密少言所獻

四明談助

卷四十五

三

替人莫能窺也弟寄寓閩中依陳寶應每語及輒流涕文帝爲之哀感曰我亦有弟在遠此情甚切他人豈知因勅寶應求寄終不遣荔遂成疾天嘉二年卒贈侍中喪還帝臨送之子世基世南

虞寄字次安少聰敏及長好學善文侯景之亂隨兄荔入臺城城陷遁還張彪往臨川強寄偕行寄與彪將鄭瑋同舟劫寄奔于晉安時陳寶應據閩中得寄甚喜陳高祖平侯景寄勸寶應自結從之不聽已寶應結婚留異有逆謀寄每陳禍福順逆折之及留異起兵寶應潛資其部曲寄乃致書極陳不可者十事云魯仲連一介男子猶義不帝秦蹈身東海况寄累世儒紳家傳忠孝寧與臧洪同日死決

不忍將軍受逆命之誅而與黥彭同菹醢也寶應覽書大怒或謂虞公病勢漸篤言多錯謬意少釋及寶應敗走顧謂其子扞秦曰早從虞公言不至今日但涕泣而已寶應既誅文帝禮遣至都還朝即日引見太建八年加大中大夫卒寄無子以兄子世南爲後

虞世南字伯施與兄世基學于顧野王爲文章慕僕射徐陵亦喜之秦王建府引爲叅軍後卽位拜宏文館學士改秘書監封永興縣子世南議論持正太宗器之隴右山崩江淮大水世南諫上願勿恃承平爲驕逸則大變可弭高祖崩大營繕山陵世南入疏諫止之少學書越浮屠智永故其體守羲之之法太宗病戈法未精手作百字雜世南

四明談助

卷四十五

四

書以示褚遂良良諦觀獨以世南所書爲合作太宗大服唐人書品世南爲第一後陪葬昭陵諡文懿

詳成化志

虞九臯字鳴鶴父當與柳宗元父鎮同爲郭子儀記室及鎮爲岳鄂都團諫判官當復刺沔州兩家子弟幼相友善九臯以文行稱貞元中舉進士遽卒于長安一時名流丐宗元爲誄稱其傳襲儒風彪炳文史克恭以孝惟禮是履相與諡曰恭甫其後遂名其鄉爲鳴鶴者以九臯字故也

曹志

勾餘土音虞氏古跡五咏

都尉講舍

骯髒仲翔骨清狂一世無聲華高竹箭神授稟桃符

孔文舉答

都尉書稱其易傳以爲不特東南竹箭而都尉自言夢授易于道士陳桃符

去國猶強諫傳經

定不孤至今來弔客莫自歎無徒

河間相公測天樓

詩話河間相公都尉子聳一作昺

河間擅絕學曾驚晉史官

晉歷志不盡以河間穹天論為然

不妨闢渾蓋

別自疏天元古窰流水上世有算聲傳

族孫散騎常侍喜傳其學著安天論

古窰亦場中地名

孫定太夫人養堂

詩話晉光祿大夫虞潭之母諡曰定

光祿再倡義大節同平南

溫太尉嶠也

更喜爽日功而無絕裾

慙慈湖有慈教忠孝足並參

東中郎遺宅

四明談助

卷四十五

五

詩話東中郎梁戎昭將軍寄也

瀕死同李業生還似管寧歸臥東山東神傷為脊令

謂兄荔

五磊白雲好高節共崢嶸

陳寶應據閩寄為所得其兄侍中荔因弟在寶應所積憂成疾

卒

永興墨池

詩話唐虞世南故址

此地溯書祖右軍有寓寮永興嗣墨妙秘監遜前茅碧水

猶疑染清魂定可招昭陵傳戈法佳話已蕭條

晉右軍有墨池在奉

化剡源之六詔唐賀秘監亦工書

杜洲童氏

童居易字行簡少穎悟知學從鄉先生李聳學古文又學小

戴禮于校書郎王休一日叅楊敬仲與語大奇之遂舍所  
學學焉登嘉定十六年進士補登仕郎攝天長簿丙申冬  
元兵攻城急邑令與主將不協居易力爲陳解遂協力捍  
防城賴以全歷陞中奉大夫知廣東德慶府尋上章乞歸  
居杜洲之濱學者從之稱杜洲先生

詳曹志

童金字子丹杜洲先生之孫家素饒裕至元間以才能薦授  
進義尉歲督海運秩滿退歸扁所居曰一間築隄浚澤興  
水利于鄉爲義塾延師以淑來學別置田二頃以給貧不  
能養死不能斂者大德中歲饑流殍相望金發積以貸全  
活者衆有司聞于朝廷祐己未旌表其門閭

詳成化志

杜洲六先生書院

節錄鮎埼亭集記

四明談助

卷四十五

六

慈谿縣鳴鶴鄉者杜洲童先生居易家焉慈湖世嫡弟子石  
坡桂氏而外卽推童氏累代不替諸家學錄中所未有也其  
時甬上書院多設山長者而以杜洲爲最盛有先聖碑亭有  
杏壇有禮殿有講堂有六齋曰志道曰尚德曰復禮曰守約  
曰慎獨曰養浩其中爲慈湖祠旁爲六先生祠有書庫有祭  
器門廊庖馥織悉畢備有田租以資學者蓋彷彿四大書院  
之規制而爲之其意良厚矣六先生者首杜洲次松簷蓋杜  
洲子鍾也次懋山曹山長漢炎則杜洲之徒最稱耆宿曾掌  
慈湖書院者也次東發黃提刑則與杜洲講道者也次草堂  
嚴高士畏亦杜洲之徒也次聲伯松簷弟鉉也曹黃嚴三氏  
其居皆在鳴鶴鄉中當日聚處于講堂最多故並祀之有明

既輟山長之命中葉以後始漸廢今諸童衰甚吾友鄭性謀興復之而問記于予是固墜緒之所當亟舉者也雖然慈湖之學宗陸東發之學宗朱門戶截然杜洲祠祭其仍推東發者蓋亦爲他山之石是可以見前輩之異而同也

### 沈孝子護母被戮

明嘉靖乙卯四月間倭賊至鳴鶴鎮沈孝子良十時年已七十餘尙有九十餘母負之而逃至五里外力竭不能行息山谷中賊追至乃跪拜請死願貸其母賊見母子俱皤髮頹老舍之而去繼至又舍之良十憐母饑渴方圖飲食賊又至舉刃欲殺其母良十以身蔽之遂被殺而母得全

曹志

### 磨石山 浪港山

### 四明談助

### 卷四十五

七

縣西北七十里磨石山在觀海衛城內浪港山在海濱去平石倭寇登岸之路二里而近觀海衛城負焉山陽有礦穴嘉靖間立廠監督開取壓死夫匠無算逮捕繫訊大爲地方之患事詳曹志縣西北六十里有松浦與古窰浦相連舊設巡檢司久圯亦見曹志

### 觀海衛

慈谿三十都

東北大海西峙虎山皆負浪港山南面五磊諸山距郡西北百五十里城廣四里闢四門明洪武二十年信國公湯和以慈谿縣塗田建築永樂十七年都指揮谷祥增崇之 國朝康熙十年奉文慈谿餘姚各築十分之五

曹志

衛與隣鄉僅隔

數里而語皆蠻音不可辨不解其故舊俗衛中居民自相婚

娶近亦有殷戶喜與隣邑巨族爲姻漸尙禮教

### 五磊山

縣西北四十五里上有五峯磊磊相比如聚米所成舊說五磊雲興則雨邑人常以爲候其南兩巖屹立如門以通出入狀亦奇怪上有宋孝子孫之翰墓成化志

### 五磊禪寺

縣西北三十里唐文德中建名靈山禪院宋大中祥符初改賜五磊普濟額今名五磊成化志

### 五峰山

縣西北三十五里五峯亭亭其下兩嵯屹立如門成化志

### 五峰講寺

### 四明談助

#### 卷四十五

八

縣西北三十里唐元和中僧志堅建舊名五峯宋大中祥符元年改賜廣福額今仍名五峯成化志

### 石柱山

縣北三十里居艮位石峯屹峙高入雲表爲縣龍發祖之地與望海尖相連曹志望海尖山名靈巖在縣東北十五里

### 石刺峯

縣北三里居乾位爲縣山少祖縣龍從此閃下下有嶺石磴蟠紆迤邐接縣治曹志

### 浮鰲山

唐縣令房琯遷縣治于此形方屬土前抱三江北東西三面瀦爲湖山浮其中形卑似鰲故名又名浮碧曹志

縣後湖

縣北山麓南北西三面距山縱廣十六畝湖中有嶼宋令陳壽彭建亭其上扁曰環碧元令烏馬兒建敬思佐治勝覽柳意四亭以為游憩之所俗呼為小湖亭久廢

八面山

縣北三里居坎位層巒疊嶂如波翻濤湧屬水曹志

慈谿縣

周為越東南境地秦置勾章縣隸會稽郡治在城山渡之南距今縣城十五里漢及孫吳因之東晉末為孫恩殘破移治小溪鎮今懸磁有城址其地至今名勾章鄉宋齊梁陳因之隋開皇中合勾章及餘姚鄞縣三邑之地為一縣唐高祖武德四年析故餘姚

四明談助

卷四十五

九

地為姚州又陞縣為鄞州八年州廢為鄞縣隸越州地皆統于鄞元宗開元二十六年始立明州以故勾章地為慈谿漢孝

子董黯因母嗜勾章溪水築室其旁汲水供母故名慈谿縣名本此縣令房瑄遂遷縣今治後

負石刺峯前面重江左山蜿蜒右山岬聳距郡西五十里歷五代宋元無改明永樂中令有失印者朝議恐失印覆出為奸改溪從谿 國朝仍之城廣十里闢為六門東曰瞻岳西曰萃寶南曰拱壽北曰拱辰明天啓間新開小北門曰輔極又穴水門于東西之左右以通潮汐嘉靖丙辰倭寇入治始為之城曹志歷代治縣官制并賢令傳詳郡邑志明季王大令玉藻與沈公宸荃起兵赴江上丙戌夏浙東再破黃冠行遯于剡溪傳見奉化剡溪下

慈谿縣學

學故在縣東南宋雍熙元年令李昭文建于縣治西北慶歷八年令林肇徙今址起鄉先生杜醇爲之師鄞令王安石爲記建炎四年金寇至學燬紹興十二年令畢瑛草創淳熙四年節度推官宋南強攝縣重建八年令唐仲溫始落成講堂舊名遵道改曰成德東西四齋曰本仁明義約禮崇智明洪武九年秦化主簿王大用改成德堂曰明倫堂三十一年典史余瑄建梯雲亭于堂之後東北建架閣庫正統十三年改建東西號房爲樓創居仁由義二齋嘉靖二十二年令陳袞廣明倫堂改會繕堂爲尊經閣遷崇孝祠神主于鄉賢祠卽其址建敬一亭三十四年以倭寇燬其明年重建 先師廟

四明談助

卷四十五

十

明倫堂尊經閣齋廡諸祠及廨宅同知侯國治令劉子賢踵成之其敬一亭號舍遂廢曹志歷代養士科條并賢師儒傳俱詳郡邑志

宋王安石慈谿縣建學記元王禕修學記詳郡邑志

慈谿人物里第未詳不脩載祇載宋元明理學名賢于後慈谿以董孝子名

大隱山本名句章以大里黃公居此始稱大隱董孝子母嗜大隱溪水寓于溪傍人遂名爲慈谿傳俱見第二卷大隱山下

楊杜二先生居大隱

大隱近城山舊縣治與今縣治隔一江爲四明山發脉支隴



吳越林無隱居大隱宋楊適杜醇二先生亦居此傳並見第二卷大隱山下

馮公初積善獲報

馮制字公初少善文天聖中舉進士不第方急于養親絕仕進意家裕好施與康定間里大饑民至相啖食家有穀數千斛悉貸之賴而全者餘百家舍之東有古陂縣長牟經俾鄉先生王致楊適耕之民數奪其瀦水制諭民穿古渠引潮以溉無復奪水之擾二先生割田爲壽制却之居常聚族子弟誨之使學務中規矩未幾弟準子碩姪景相繼第進士躋顯官鄉人榮之

成化志

張文靖經筵進諫

四明談助

卷四十五

十一

張慮字子宓唐建中宰相鎡之裔習詩易復工詞賦登慶元進士教授臨江樓宣獻見而器之俾淑族子弟暨爲翰林學士復舉以自代遷博士時金將亡上疏言昔聞其衰則喜今聞其衰當懼今雖足以偷一時之安而所當深防者實在乎自治端平元年天子遴遴經筵官召慮講月令至孟秋決疑訟必端平反復數百言復成月令解十二卷以進陞國子祭酒工部侍郎龐眉冠帶諸生望之肅如也壽八十卒謚文靖

成化志

孫守叔首稱廉吏

孫夢觀字守叔登寶慶丙戌進士第除太常簿陞對首言人主聽言不容有所憚尤不容有所玩憚則有言而不能容玩

則雖容而其言不能用引歸逾年復召陞國子司業出守宣州悉蠲逋賦丞相董槐首以廉吏聞除司農少卿奏論內外之人各遂其私謂王安石去熙寧之君子則名爲流俗蔡京去元祐之君子則名爲邪黨秦檜去紹興之君子則名爲異論李沐陳賈去慶元之君子則名爲僞學當今復倡虛議欲盡收更化以來所收召之君子非所以爲世道計不報成化志以集賢修撰知建寧府得疾卒詳曹志

蔣季莊閉門窮經

傳附見十九卷桂芳橋高氏下

陳徵士受給不校

陳徵士之翰傳見十九卷月湖寓居下

四明談助

卷四十五

十二

顧主簿細事不苟

顧主簿不知何許人南渡後寓于慈谿廉介有常安于貧賤不祈人之知至于踐履間雖細事不苟也平旦起俟賣菜者過門問菜把直幾何隨所言酬之他飲食布帛亦然久之皆信服不忍欺苟一日之用足則玩心典墳不事交游里中有一不安其分武斷強伎者相與譏之曰汝豈顧主簿耶見容齋三筆成化志亦見王伯厚七觀注

春風齋兄弟講學

烏本良字性善自幼同弟斯道講論問辨經史之餘作詩習字學卽爲先達所推獎一日得慈湖楊文元公遺書諷誦文元公春秋易解先天大訓如坐春風中遂以春風名齋斯道

字繼善號春艸詞章書法高出本良而小楷行草又極其妙近遠求之屢常滿戶庭嘗令永新未幾卽謝事所著有秋吟稿春艸齋集子熙字緝之亦以詩文名于時詳成化志獻縣令拒靖難兵

向朴字遵博父壽師趙偕得聞慈湖遺旨樸承家學洪武末受獻縣知縣獻無城郭值兵燹後節用愛人晝夜勤督農桑流遺復業又設義學暇則講道其中會燕王兵起州縣望風納欵樸首倡大義集民兵拒守曰吾知有君不知有君之叔也與燕將譚淵戰被執懷印而死民從泥淖中拾得殘骸葬于道傍至今獻民猶寒食上冢如哀父母云賜諡烈愍裔孫叙諸生嘉靖丙辰海寇入縣爲護母被戕詔旌其門詳曹志

四明談助

卷四十五

十三

楊布政素稱循吏

楊子器字名父成化二十三年進士初令崑山陞考功主事倡五經會或謂曹局清嚴不宜泛有交游則謝曰吾學不欲以仕廢顧以地絕人耶出爲湖廣叅議陞河南右叅政時山東流賊渡河走襄鄧子器兼程赴之嚴令以狗賊遂引去懇疏乞休冢宰楊一清欲大用之爲寢其奏會江右冠作復改江西左使以入覲道卒詳曹志

下詳城內古蹟逸事

三孝鄉

慈邑舊有董張孫三孝子祠故稱三孝鄉云曹志

漢孝子董黯事詳第十卷渡母橋純孝廟碑記

唐孝子張無擇字君選永隆初由進士歷遷華陰令屬羅織獄起無擇每以恤民爲己任未嘗私附朋黨民賴以寧尋刺和州丁父袁州司馬叙憂奉喪歸里葬于邑之虎胛山負土結廬三年不櫛七日絕漿感醴泉芝草之瑞服禫辭祿廬墓以壽終宋嘉定十四年邑令趙崇遂附祀于董孝子廟

曹志

宋孝子孫之翰字文舉少志學天性孝友母病劇刲體取用爲粥以進越夕母如醉自醒乃底以寧里人以其事上于郡守趙伯圭將聞于朝之翰曰本心救母他無所覬力止之卒葬五磊山咸淳間令金昌年立位于董孝子廟右祀

之

曹志

四明談助

卷四十五

十四

城東王孝女

節錄南雷文定碑記

王孝女者慈谿王孜之女也居城之東偏歲丁巳七月十八日夜二鼓失火孝女母卒停柩于中堂孝女處樓上趨至中堂疾呼舁柩無應者已而火至孝女伏棺上不肯去其父從火光中遙見之抱之而出則已死灌以礬水稍甦聲出喉間僅絲髮問母棺出否家人不答遂哽咽氣絕時年十五也先是四月之盡城中菊花盛開觀者絡繹不知其爲何祥也至是而有孝女之事孝女顧委巷中紅女織兒耳天地不以其渺末而氣候爲之密移則夫今日之撐駕天地者其不在通都大邑之貴人亦明矣 誄曰伊惟孝女幼而窈窕萱草霜披帷堂月暴粉書識魄鏡臺留照所以孝女米鹽必告

未火之先

家中細事後孝女必告柩前而後行 諄諄出出夜半融風火如狂濤烟燄蔽空  
孝女不見烟燄而見母容豈忍絕裾離此簾櫳母棺出否旁  
無答者恨此一身不與同赭形爲父留魂不母舍闔然而瞑  
哀動城野曹娥投水王女赴火水火死形死仁不可百里千  
年雙碑翠鎖吾作讖語江流不墮

### 大司成坊

文廟之東明正德五年令倪璋爲陳敬宗立

曹志

陳敬宗字光世永樂二年進士選庶吉士與修永樂大典歷  
轉南國子司業遷祭酒敬宗美鬚髯形容端整步履有定  
則力以師道自任每升堂聽講設饌會食整肅如朝廷堂  
下僚屬憚其嚴誣以他事訟之法司事亦竟白引年致仕

### 四明談助

#### 卷四十五

十五

家不輕出有被其容接者莫不興起後贈禮部侍郎謚文  
定曾孫文謨嘉靖四十一年進士官刑部主事以坑直稱

曹志

### 靈應廟牡丹

縣東一里有鮑王蓋行祠宋淳熙九年祠中忽產牡丹一幹  
二花其一花紅紫相半而中分之香色異常經旬不散

曹志  
祥異

### 東鎮橋姜氏

東鎮橋有經元坊成化間令王義爲姜森立今圯

曹志

姜國華字邦實父槐有長者行嘗得遺金于市須其人還之  
一婦鬻葛得僞金行哭求死槐易以己金而投僞者于水  
國華成嘉靖三十五年進士歷遷南刑部郎陞廣東僉事

歸前後治獄多平反尤潔己自持萬歷十三年子應麟爲戶科給事中抗疏爭鄭貴妃冊封事請早定國本撻神宗怒禍幾不測語傳至里中家人憂泣國華笑曰吾垂老不意兒曹能作此等事雖受竄殛不恨矣後應麟被謫移餘干令迎養三年乃卒

詳曹志

姜應麟字奉符萬歷十一年進士由庶常改戶科給事中貴妃鄭氏生子常洵詔晉封爲皇貴妃而王恭妃育皇長子已五歲無所益封應麟首抗疏言禮貴別嫌事宜慎始請先封恭妃爲皇貴妃而後及于鄭妃則禮既不違情亦不廢尤望俯從閣臣之請冊立元嗣爲東宮以定天下之本則臣民之望慰宗社之慶長矣疏入帝怒次日降旨謫極

四明談助

卷四十五

十六

邊禠職得廣昌典史居四年量移餘干知縣以父憂歸光宗立起太僕少卿引疾去年八十五卒贈太常卿賜祭葬

詳曹志

姜思睿字耑愚少孤事母孝天啓二年進士由中書改御史崇禎三年都城被兵歷陳危削之形責政府中樞及在朝在邊諸臣甚切四年帝命內官監視邊務抗疏諫不聽已劾首輔周延儒奸邪諸不法狀請罷斥之五年出按雲南瀕行歷陳中外弊政忤旨切責時雲南諸峒反屢征不克思睿至自隨數騎抵峒撫降之滇昆明池及徵江皆廣二三百里多水患思睿築洱宗邢圍白塔七壩民咸賴焉還朝爲御史久聲望甚著未幾假還卒

詳曹志

姜宸英字西溟學者稱爲湛園先生少工詩古文名達 宸聰有當今作者之譽于是應試入闈同考官無不急欲得公者會徵博學宏儒宗伯韓菼暨江浙二撫各以宸英名上 聖祖聞其才學一日語廷臣云朕知江南三布衣一朱彝尊一嚴繩孫一姜西溟獨宸英稱字亦異數也已而徐相國元文疏荐特授翰林院纂修明史官又以崑山徐司冠乾學薦兼修大清一統志命所著刑法志進呈及先後上凱歌南巡詩頌輒加稱獎中康熙丁丑會魁至殿試讀卷名在第七 聖祖識其字特拔置第三時年已七十矣居家篤于孝友與人交悃惓無城府惟談及文字輒媿媿不休書法鍾王詩以少陵爲宗己卯同主順天試坐累

四明談助

卷四十五

十七

免官瘦死湛園之文最著名者爲明史稿刑法志極言名中葉廠衛之害淋漓痛切以爲後王殷鑒一統志中諸論序亦經世之文也

結埼亭集墓誌

弟宸尊有詩名由舉人授龍門

知縣未任卒子嗣洙拔貢生署樂清教諭

曹志

西鎮橋劉氏

西鎮橋有青雲坊正統間知府鄭珞爲舉人劉煒立

曹志

劉氏

聚居于此又稱集賢里

劉振之字而強童子時卽以忠孝大節爲己任及長窮探經史彙所得爲三集曰名臣曰理學曰忠節統名曰尚友錄崇禎三年黃道周主浙試以毛詩舉第六人改教東陽陞鄆陵知縣會流寇蔓延秦蜀間汴民亦以歲饑聚爲賊一

日督府符下令統州邑兵勦賊振之大集諸將朱仙鎮卽日統兵圍古城殲之又連破袁老山一條龍等寨招降扶溝大賊徐完完已降復叛振之以計伏兵殲其衆自是賊見鄆陵旗卽遁威名震汴中崇禎十四年十二月闖賊陷許合衆大至攻圍百端城中矢石盡遂陷振之易服謁先聖秉笏坐堂上賊擁見渠帥欲降之振之裂眦罵賊怒以火烙炙之罵益烈復裸置大雪中三日夜乃剖胸屠腸支解殺之事聞詔贈太僕少卿建祠死所黃道周題其門曰忠孝大儒

詳曹志

劉應期字瑞當世爲慈谿人崇禎間吳中倡爲復社以網羅天下之士高才宿學多出其間主之者張受先

采

張天如

四明談助

卷四十五

十八

溥東浙馮留仙

元颺

鄴仙

元颺

與之枹鼓相應皆喜容接後進

標榜聲價人士奔走輻輳其門當是時慈水才彥聚會姜

耑愚

思睿

劉瑞當馮元度

文偉

馮簞溪

京第

諸子莫不爲物望所

歸而又引旁近縣以自助甬上則陸文虎

符

萬履安

泰

姚

江則余兄弟晦木

宗炎

澤望

宗會

蓋無月無四方之客亦無會

不諸子相徵逐也嗚呼盛矣瑞當于諸子中芒寒正色諸子皆引爲畏友交道雖廣而所至情契不過數人其激揚題拂之疏望瑞當峨眉天半不可得而親也諸從遊先後成進士至爲天子元老侍從其下者亦且爲二千石郡縣長吏獨瑞當蹭蹬老諸生布衣揖讓于博士前晚乃以貢待一儒官胸中不能無芥蒂友朋高會瑞當恒坐席端文



虎次之酒酣耳熱兩人輒離席長歌曼聲相和喟然曰吾爲同輩駕累置身鑪鞴之上無乃益彰其老醜耶未幾而南北橫潰聲實陸沉交遊事息返顧閭里則耑愚元度以疾死留仙鄴仙以憂死文虎以刺死簞溪以兵死所在情契鯨鯢相望瑞當之風波亦爲里中指名卽塲屋放言悲歌流涕亦不可復得嗚呼何其哀也瑞當深沈有識嘗與之謁劉先生時瑞當北上先生傳語留仙冠深事急當爲扈從計先生不輕談機事蓋信瑞當之深也簞溪受禍親戚不敢過其門瑞當見其夫人而謂之曰今日之事夫人唯有自盡吾待命于此夫人死瑞當始出瑞當卒于戊子卒後二十四年葬于鄧山飛鳧之原

詳南雷文定墓誌

四明談助

卷四十五

十九

德星橋

縣西南唐貞觀三年建舊名大寶橋後改永明橋宋開禧二年令趙希觀易今名

永明教寺

縣西南二里唐儀鳳三年邑大夫呂珂捨宅爲寺高宗賜大寶院天寶中改大寶寺宋大中祥符元年改賜今額有四香亭寺前有橋紹聖中建亭其上曰迎薰外立牌門扁曰寶峯

宋林露撰藏殿記

成化志

聚奎堂相術奇中

景泰元年慈庠生馮彰時中桂琛羅信佳鄭岑五人讀書于永明僧舍時有瞽嫗能摸骨占人貴賤奇中時當大比士子

趨問之少所許可或引至僧舍相此五人首遇馮驚曰舉人在此矣繼而時與桂競就之連許曰又得二人羅就榻臥詫曰此妄語也一相而得三舉子有是哉其三人強使就榻摸羅生復驚曰此連科進士也鄭最後至摸其腰曰好一條花金帶衆益非笑之未幾秋試五人果聯榜羅果連第進士而鄭岑仕至叅政皆如其言張憲都楷因題其堂曰聚奎夏大理卿時正爲之記

曹志

### 三元坊

坊在縣前爲萬歷丁酉經元甲辰會狀楊守勤立

曹志

楊孫仲嘉靖二年舉人知儀真縣清操凜然一勢璫窘簿尉

甚孫仲微言諷之輒解去以忤臺使謝政歸

曹志

### 四明談助

#### 卷四十五

二十

楊世思字汝位邑諸生儀真令孫仲子也嘉靖丙辰倭闖入邑人皆驚遁孫仲獨危坐不動世思泣請不得扶母攜弟出境復還候父幸無恙世思學宗慈湖衣冠言動具爲世儀子守勤舉會殿試皆第一人封修撰

曹志

楊守鄞字克之生而豪放不羈爲文千言立就萬歷三十二年會試廷對俱第一授翰林修撰尋丁艱服闋歷遷諭德充東宮講官進退嫻雅遇古今善敗可脩法戒者尤諄諄隨事進規光宗每爲竦聽尋陞侍讀以疾卒

詳曹志

國朝

嘉慶己卯探花楊九畹其族孫也

### 司諫坊

縣治南司諫坊正德間爲給事中孫懋立

曹志

孫懋字德夫正德六年進士授浦城知縣以治行第一徵南  
吏科給事中首疏大學士楊廷和奪情起復直聲震一時  
御史張經寧波府知府翟唐忤奄人被逮懋偕同官論救  
復疏劾織造太監史宣皆不報倖臣錢寧江彬等導帝遊  
幸羣臣疏皆留中十二年八月彬復導帝幸昌平駐蹕居  
庸關外懋疏請還蹕者三皆不省尋又上急除奸佞疏是  
時帝方日事娛樂章奏皆不省覽臣僚規主闕者往往無  
罪而一觸奸佞其禍立至疏上人皆爲懋危會彬亦以侍  
帝故無暇理懋疏懋竟得免世宗嗣位出爲廣東兵備副  
使以忤旨下詔獄謫藤縣典史歷陞至應天府尹以進試  
錄忤旨致仕卒贈右副都御史

詳曹志

四明談助

卷四十五

二十一

周文穆識小編云嘉靖中慈溪孫懋以應天府尹致政家  
居生事甚薄每食蔬食菜羹而已一日偶思肉味市肉一  
斤爲羹以進諸孫環席乞之公感愴爲之輟羹

孫成名字仁甫應天府尹懋之孫隆慶五年進士由庶吉士  
改福建道御史巡按直隸河南山東廣西皆著風裁出爲  
應天兵備副使以抗直謫官歷陞至湖廣提學僉事病篤  
猶閱卷不置蓋不愧其祖云

曹志

大司冠坊

在縣治南嘉靖壬戌都察院胡宗憲爲嘉靖丙戌進士馮岳  
立又有忠顯坊天啓七年爲馮涇立

曹志

馮涇字伯清正德九年進士授禮部主事轉員外郎武宗南

巡偕同曹伏闕諫罰跪午門五日復廷杖五十竟死杖下時諸曹聯章迭諫皆指目江彬彬怒甚囑典詔獄者重其杖以故諸臣多死哭聲徹禁掖而帝亦爲感動遂罷南巡世宗立吏部以狀聞詔有司厚恤其家子秉儀嘉靖十年舉人官應天府通判以清簡稱

曹志

馮岳字望之嘉靖五年進士由刑部員外郎恤刑江右再遷濟南知府命仍兼恤刑前後釋滯獄千五百餘人貧不能贖者捐俸助之兩省囹圄一空以憂去官服闋知延平府歷陞右副都御史巡撫湖廣會蜡爾山苗叛乃進岳兵部右侍郎總督湖廣川貴岳勦撫兼行蜡爾遂平已邛水酉陽小平茶等苗復叛岳曰是不一大創未已也統兵四萬

四明談助

卷四十五

二十二

誅之捷聞賜金幣廕一子嘉靖三十五年播州苗盧阿項復倡亂爲變旁郡皆被侵擾岳授總兵石邦憲方畧分三道環攻斬首萬餘級諸巢盡平事聞晉右都御史再廕一子尋入爲南刑部尚書部政大釐以年逾六十引年致仕至八十七而卒從弟璋嘉靖十七年進士歷官漳州兵備副使亦以勳伐著

詳曹志

馮若愚字明甫父季兆嘉靖四十三年舉人署鎮平諭邑窮僻不知五經季兆口授毛詩講論娓娓士始有登賢書者遷工部司務會權璫有以銓曹陷者季兆遂拂衣歸若愚由進士歷工部郎中出知襄陽府先是礦稅議起貂璫啣命四出楚璫秦奉尤鷙橫自開府武昌而以原奏衛國賢

充錦衣開府襄之樊城黨與分布襄民洶洶思亂嘯聚成七寨若愚抵任洵知歎曰不急爲計安用太守爲陰爲部署一日急召教諭徐中節授之兵以計誘國賢出盡縛稅署牙爪而自策單騎掩國賢國賢驚股戰挽徐教諭鬚至絕而左右無一應者遂縛置郡獄縱火焚其畫舫諸黨與之在他邑者亦一時盡縛自襄至武昌皆譁傳太守神人而七寨民亦詣府門崩角慟哭願解刀劍歸隴畝奉聞恚甚飛章上變楚人邀其疏漢濱兩月不得達時稅使月有進奉至是兩月無疏神宗因撤奉回已復詔盡撤各道稅使天下翕然誦朝廷之明不知若愚一擊使然也若愚亦坐是久不遷在襄久視官如家民亦視如父九載考滿乃

四明談助

卷四十五

二十三

投劾歸光宗登極起南光祿少卿又遷太僕少卿病作歸

里卒贈太常卿

詳曹志

馮元颺字爾賡號留仙東漢馮異之後南唐尚書延魯徙于慈溪至有明而盛太僕寺卿贈太常寺卿若愚之子也中崇禎元年進士授工部主事思陵誅逆闔魏忠賢凡宦因魏忠賢者定爲逆案逆案之徒出奇計以邊事陷君子而闔人失勢者亦時以閭巷見聞入告于是思陵遂疑在廷諸臣皆朋黨不可信任一切干涉兵餉皆使闔人監之太監張彝憲總戶工二部欲以屬禮待司官公上疏力爭彝憲大恚而公弟元颺在諫垣亦疏爭中官出鎮兄弟並與闔宦爲難公遂請告歸居三年起爲禮部主事遷員外郎

中出爲蘓松兵備叅議溫體仁當國唐世濟爲都御史皆烏程人其鄉人爲盜太湖者倚之爲窟穴公勾捕一無所貸最後捕得其渠魁論殺之則世濟族子也尋遷福建提學副使未行吳中有數大獄未具巡撫張國維疏留之會太倉張溥張采與諸郡生徒倡爲復社州人陸文聲以不得附怒走京師昌言攻擊溫體仁遂以復社嗣于東林爲天子危言之公仰天歎息曰東漢之禍一牢修成之彼陸文聲者將踵其故事耶具疏辨之于上有旨降公山東運判而吳中黨禍亦解十一年 大兵入畧三輔大輜山左濟寧告急以公攝兵道事時總督盧象昇闖人高起潛分任東西二路盧公主死戰高闖主活仗十二月二十日夜

大兵攻濟寧公擊退之以城守功陞天津兵備道未幾巡撫天津兼理糧餉都察院右僉都御史十五年冬 大兵復大入公與諸鎮犄角之論功賜銀幣廕一子錦衣衛十六年十月公密陳南北機宜謂道路將梗當疏通海道防患于未然天子俞之公乃具海舟二百艘以備緩急明年三月使其子愷章入迎天子航海行幸留都初七日愷章至京師旁皇不得要領歸報于公未數日而京師陷公不得已拔身而南欲得一當值宏光卽位言討賊者絀之公遂鬱鬱而死踰思陵之崩蓋五月也公爲經義有名周旋朋黨之間每爲名士所歸楊嗣昌嘗字公而不名有郎官問曰留仙誰也嗣昌默然久之曰不知馮留仙耶其爲世

所稱重如此然公未嘗修飾時譽故黃公道周曰我友天下未有真誠若留仙者也子愷章字佇相監國賜進士授行人司行人

詳南雷文定

馮元颺字爾崧號鄴仙天啓二年進士知粵揭陽以剪山海巨寇著名崇禎初徵授戶科給事中疏爭中官出鎮兄元颺亦疏論中官張彝憲兄弟遂負直聲已復疏詆輔臣周延儒誤國被切責尋乞假歸八年春還朝時皇陵毀廷臣多歸罪內閣十年正月朔日食公復指斥內閣皆不納再遷刑科左給事中公前後在諫垣近十年專以摘發奸相扶植正人爲事歷遷兵部右侍郎轉左十六年五月代張國維爲尚書帝倚毗甚重常稱馮先生而不名八月稱病

四明談助

卷四十五

二十五

乞休歸里七月而卒公長于知人料事孫傳庭治兵關中貽書戒毋急戰後果以輕出覆軍其引疾去也猶荐李邦華史可法自代焉子愷愈字道濟由廩生廕錦衣衛正千

戶博學工詩文

詳曹志

馮元颺字沛祖號眉仙太常卿若愚子太常三子長元颺天津巡撫次元颺兵部尚書而公最少馮氏于慈溪代爲冠冕家而津撫兄弟尤以盛名見重于世時有大小馮君之目崇禎壬午以貢士待試春闈時寇禍亟思陵倚任尚書與戶部倪公調兵調食委以心膂而猜疑未化思有以嘗之一日已晚忽有人叩尚書邸求見尚書以事冗顧左右請三相公出見之謂公也公出則其人以三千金求一邊

帥缺公怒標而出之以告尚書尚書喜曰真吾弟也次晨尚書入朝思陵迎笑而語曰卿家三相公真卿弟也尚書駭愕乃知昨夜之人上所遣也津撫聞之亦大驚而于是三相公之名繼大小馮君起是科公以五經成進士時尚書爲國理樞務月憂日瘁遂成沉疾得假而歸津撫進南遷之策旣不得達京師遂陷津撫誓師討賊監司內叛自拔南歸于是大小馮君相見于杭執手涕泣共約赴南都請復仇自効而赧王方翻逆案東林黨人概置不用甲申九月津撫與尚書十日之中相繼以鬱鬱死公號咷不已思繼兩兄之志南都授兵部主事已而靖南伯黃得功出討左兵請監其軍乃改上江兵脩僉事持節視蕪湖軍蕪

湖告捷而大兵渡江赧王蒙難公跳身至錢唐則潞王迎降乃歸慈水令沈公宸荃起兵公大喜告于兩兄之靈而行江干進公太僕寺少卿公輸家財以充餉而江干又破公歸哭于兩兄之墓曰國事今已矣賴宗社之靈或可以一綫支兩兄其實助之遂赴翁洲時翁洲爲威鹵侯黃斌卿所守公至問以監國消息則曰前數日已入閩公呼天長慟公以貴介公子未嘗遭困苦至是驟加憂憤神氣俱索終日望海咄咄不旬日而病病甚不肯進藥斌卿往視之公張目曰下官累世並受國恩而先伯仲耿耿之志未遂而死將以望之下官而今又死天也言訖而瞑

結埼亭集

馮京第字躋仲號篔簹溪都御史元颺大司馬元颺太僕少卿



元颺公諸父也魯王時授公監察御史督師江上事去退  
守杜畧山寨爲叛將王昇所誘械見金礪支解死其後昇  
亦伏誅事詳三十七卷杜畧馮督師傳

高中丞斗樞弔馮少司馬詩兀颺

水犀入海胡笳勁吹騰妖霧淆霜鏡萬壑千巖梟與獍東  
鯤絕島鑾輿幸失路孤臣苦望洋慟哭呼天天轉夢書生  
環甲非其性國恥攻心熱血併陞山鳩旅扇朱旗棘矜轉  
戰久能勁黠虜西來萬騎驕彌天鳴鏑捷于颺憑怒狂馳  
山欲搖列壁蒸徒棄甲逃鼓聲不起弓刀折獨揮死士隱  
巖椒雄心遵晦氣未消肘腋戈鋌變一朝丈夫正氣回天  
地成敗偶然安足喟頭行萬里亦其常一任蒙心覩面之

四明談助

卷四十五

二十七

徒笑且詈吁噫嘻君臣古道委逝波短狐白晝羣婆娑昔  
年心膂今操戈假使文山當此日笑詈紛紜更若何  
句餘土音擬薤露詞

長恨其安窮馮公子持服

中丞死不瞑目爲憤阮家兒那得食其肉中樞死不受含  
爲憤隨兄逝何如攀龍髯空餘小叔乘槎去蹈海而死更  
誰與國破家亦亡孤兒哭夜雨持喪固有終長恨其安窮  
聊將一幅縞寫此終天恫

詩話吾鄉大小馮君當國難時論者不無責備然兩臣  
雖非以殉城殉國死亦非以良死其心尚可原也況少  
弟眉仙起兵從亡足以了二兄未畢之志而中丞次子

愷章畢生縞素其亦可哀也夫

笑陳謨

馮職方登場

春夢婆滋吾痛且登場理昨夢長歌哀勝一慟新亭泪如

涿洞笑陳謨昔儻僉今如此吾誰訟

時有市兒陳謨以告密驟見用卽官寧紹

台道職方登場歌慢詞詈之謨聞而怒大加摧辱

詩話馮職方家禎與于戊子五君子之難得免遂以度曲遣日袍笏登場所謂長歌勝于痛哭也

家禎曹志作家正祖詢父其美皆諸生兩世以孝友聞家正登崇禎四年進士歷遷禮兵二部郎中素善文倔強豪放不受約束晚乃益肆力于詩古文旁及樂府其羣從家畜歌伶家正集請名士填數十闋授伶人尅日

四明談助

卷四十五

二十八

呈伎家無擔石怡然也

宮保坊

縣治南鼓樓前有尚書坊爲宏治癸丑進士兵部尚書姚鏞立西南宮保坊亦爲兵部尚書姚鏞立狀元坊爲嘉靖癸未科姚涑立

姚鏞字英之宏治六年進士由禮部郎擢廣西提學僉事正德十五年拜右副都御史巡撫延綏先是武宗以十萬衆駐其地鏞撫循有方已上邊務六事皆議行嘉靖元年遷右都御史提督兩廣軍務兼巡撫田州土官岑猛謀不軌鏞斬首以獻詔進左都御史加太子少保猛黨詐言猛不死借交趾兵二十萬且止由是訛言謂猛實在巡按御史

石金信之劾猛失策罔上帝以鑢有功許便宜撫勦會廷議起王守仁督兩廣軍令鑢與同事鑢引疾乞罷卒不起鑢爲人剛毅博大所至以興起教化爲己任在榆林事暇輒進諸生課之雖位九列人猶以未竟其用爲惜焉

詳曹志

姚涑字維東尚書鑢之子嘉靖二年殿試第一授翰林修撰明年大禮議起涑爭之力帝怒杖于廷又議郊祀合祀不當輕易時爭誦其疏轉侍講學士會丁父艱哀毀卒涑務爲經濟之學時有翰林三長之目謂經學政事史才也從兄汀字維寧宏治十二年進士歷袁州知府亦以政績著

詳曹志

驄馬橋

四明談助

卷四十五

二十九

縣南舊名御史橋唐開元二十六年令房瑄建瑄嘗爲御史故名元至正六年簿白桂僧置石闌重修二亭于橋之南北南曰凝翠北曰通關歲久亭圯明天順二年知縣賈爽爲都御

史王來立坊更名都憲橋

曹志

王來字元之盧氏令桓之孫父伯堦爲金溪令縣有五聖祠能爲禍福來方年少一日持斧往碎像而燬之撤其祠父奇焉宣德元年與仲弟復同舉于鄉以會試乙榜署新建教諭用薦擢御史巡按蘓松常鎮四府中貴陳武以太后旨使江南橫甚數爲來所抑還愬于朝帝問都御史顧佐巡按誰也佐以來對帝歎息稱其賢及報命獎諭備至英宗卽位歷遷河南左布政使十四年改左副都御史巡撫

河南及湖廣襄陽諸府也先逼京師督兵勤王渡河聞寇退引還景泰元年貴州苗韋同烈作亂勢張甚進來右都御史總督軍務會保定伯梁寶都督毛勝方瑛討之來等分道邀擊連戰皆捷同烈以衆數萬退據香爐山陡絕來遣勝瑛與都督陳友三道進而已與寶大軍繼之先後破三百餘寨賊勢孤遂會師香爐山下發礮轟崖石呼聲動地賊窘懼縛同烈并賊將五十八人降餘衆盡釋之奏賊平乞班師召爲南工部尚書陳時政十二事英宗復辟致仕子鑰中景泰四年鄉試官監察御史

詳曹志

王淮字柏源博極羣書考索詳審嘗與錦衣湯引勣遇于湖之慈感寺對語移日不相下及舉青陵臺事淮曰青陵臺

四明談助

卷四十五

三十

有三引勣止得其二淮歷歷口誦無所遺引勣始歎服翊日語知府岳璿曰柏源行秘書也淮生平好作長歌下筆數十韻造語奇麗擅名江湖間

曹志

下詳邑外自北而東而南諸勝

闕峯山

縣東北一里吳太子太傅闕澤居其下故名

曹志

闕相祠

縣東北闕峯之下祀吳太子太傅闕澤相傳普濟寺其故居宋皇祐二年令林肇建今遷于寺內

曹志

三國闕澤

字德潤家世耕農至澤獨自力于學貧無資嘗爲人傭書

以供筆札寫畢誦讀隨徧精思講論至忘日夜由是顯名  
孫權辟補西曹掾權稱尊號以爲尚書後改中書令拜太  
子太傅以勞封都鄉侯

詳曹志

### 普濟教寺

縣東北一里吳赤烏二年都鄉侯闕澤捨宅爲寺後廢唐大  
中二年令李楚臣復立爲德潤院以澤字德潤故名乾符中  
勅賜應天德潤寺宋大中祥符元年改賜今額寺之東岡有  
松如龍有石如虎名其軒曰松石

寶慶志

寺僧遂端示寂後口

吐青蓮窆于縣東湯山詳見後湯山窆處

### 龍虎軒

舊名松石宋元豐令盛次仲更名龍虎題云一松偃蹇蒼龍

### 四明談助

#### 卷四十五

三十一

蟠一石巉巖怒虎踞我來題作龍虎軒便恐風雲捲將去

寶慶志

志

### 普濟湖卽慈湖

縣東北一里唐開元令房瑄開鑿之以溉民田名闕湖又名  
慈湖以普濟寺在其北故名普濟湖寺僧築隄湖中直貫南  
北以通往來景定五年令金昌年疏浚之廣隄防置則水磳

寶慶志

自明迄今屢經修治

### 金沙岡

城北闕山楊文元公詩云岡湧金沙來幾里貼天灩灩白雲  
裏雄峯健隴四奔馳每每回顧慈湖水

### 四景亭

舊在湖之北闕山右峯元至元間令富德庸取宋桂錫孫重  
浚湖記之語云春種程令之柳夏愛濂溪之蓮秋營瓊田霽  
月皎于晴碧冬凝玉界白雪擁于寒清四景映慈湖之門墻  
一曲涵咏沂之氣象因名四景亭

慈湖楊氏

宅旁有談妙澗連理圃等蹟詳曹志

楊庭顯字時發慈湖先生之父學者稱老楊先生

楊簡字敬仲號慈湖乾道五年進士仕終寶謨閣學士諡文

元曾講學于碧沚史氏全謝山有碧沚書院記 上二傳

互見十八卷月湖碧沚二十二卷正學祠下

楊恪字叔謹慈湖先生之子歷官福建通判克承家學

曹志

楊芮字大章文元公五世孫文行夙優非義不苟取予元學

四明談助

卷四十五

三十二

士危素御史虞嘉賓交薦不起洪武四年有司特起之仍  
以疾不果行子伯成以學問老成舉授都昌縣丞孫圭以  
資稟端慤舉知郟縣景泰時又有江者編輯慈湖志四卷  
嘉靖時淡復春秋祭祀淡于書院西構小樓三楹制甚朴  
陋扁曰鳩居樓前爲圃八九畝而穫常數十畝之殖歲有  
餘饗焉淡蓋自食其力無求于人者楊氏世篤先訓不墮

所守如此

曹志

慈湖書院

宋咸淳七年副使劉黻奏建慈湖書院于普濟寺右祀鄉先  
生楊文元公簡置山長弟子員以領春秋祀事古涪文公及  
翁爲之記入元書院毀爲浮圖副使侍其公君佐行部卽先

生家廟改建書院一如宋制王應麟爲之記明洪武元年改天下山長爲訓導書院田皆令入官書院因以不治而祀亦廢嘉靖丙申令薛應旂至任乃詳請撫按督學改普濟寺爲正學書院薛公去後當道將寺仍歸本僧薛公聞而恨之壬子校士至郡爲立四賢祠于鎮明嶺以酬己志邑令劉逢愷修舊祠請復春秋二祀載在祀典以至于今

詳曹志

### 慈湖書院山長

元時葛魁以學行充慈湖書院山長世居邑學之南元貞四年有術者云學宮門外必南鄉直達有甬道方局壯氣通科名大振魁毅然曰吾何惜片壤不以全一邑之勝遂割其地之半廣五十尺袤三百五十尺歸之學宮恢廓其

### 四明談助

#### 卷四十五

三十三

制當事嘉魁之義每歲春秋廟祭給胙獎勵

曹志

### 石坡桂氏

桂萬榮字夢協登慶元二年進士授饒之餘干尉子弟獲其訓迪不爲不善嘉定間通判平江時守朱在政尚嚴刻以鹽課拘繫甚衆榮具書告在不從于是挾行牀與所拘人同寢在愧卽委縱遣陞守南康先是軍士驕悍至則妥帖如紀律檢吏奸省浮費征稅以法民幸其利進直秘閣遷尚書右郎除職寶章不赴奉祠崇禧壽九十卒榮嘗築室東山之麓號石坡書院讀書其中取古人資于折獄者類成棠陰比事行于世從子錫孫紹定五年進士歷官監察御史兼從政說

書忤旨畀祠歸里安貧樂道學者多宗之

成化志

桂同德號容齋宋寶章萬榮之四世孫篤信好學于經史無不淹貫教授郡庠以德行爲本嘗立諸生于講後言曰窮經究史固學者事而入孝出弟尤所先務今日之孝卽他日之忠忠孝兩全人道備矣苟規規于章句而不眞履實踐此爲人之學非聖賢之學也是故一時親炙其教者咸有成立越九年卒于官著有容齋集詳成志

桂彥良名德稱以字行宋寶章萬榮五世孫也幼好學記誦敏捷仕元爲教授因朝政不綱退隱田里明太祖召見特授太子正字賜宴與公侯列坐恩遇隆洽稱曰老桂不名上嘗御大本堂彥良與秦府紀善林温入見上問曰卿等何官彥良對曰正字温對曰紀善上謂彥良曰卿帝者師

四明談助

卷四十五

三十四

也謂温曰卿王者師也其各自重彥良感荷知遇知無不言洪武八年特授通奉大夫晉相府右傅十三年諸王府罷相府改彥良爲長史時已老矣以風疾賜歸卒于家所著有清節集清溪集掛笏集老拙集和陶詩春和詠傳于世 仲子慎授中書舍人季子全以明經舉任陝州知州陞山西平陽知府遷漢府紀善俱以文行名于時詳成志桂瓌字懷英爲人倜儻不羣自幼至老讀書手不釋卷所積充富望之不見涯涘一時縉紳士夫咸高其學及門請益者無虛日相語不以名氏而稱之曰古香先生所著有桑

榆稿若干卷

成化志

石坡書院

節錄結埼亭集記



慈湖弟子徧于大江以南其最能昌明師門之緒者莫如鄞之正肅袁公蒙齋侍郎陳公習庵及慈之寶章桂公石坡顧袁陳以名位著而桂稍晦今慈湖東山之麓有石坡書院卽當年所講學也桂氏自石坡以後世守石坡家法明初尚有如容齋之敦朴長史之深醇古香之精博文修之伉直聲聞不墜至今六百餘年猶有奉慈湖之祀香火可謂遠矣乾隆改元其子孫謀重新書院而先問記于予石坡講學之語皆本師說曰明誠曰孝弟曰顏子四勿曾子三省其言樸質無華葉蓋以躬行爲務非徒從事于口耳故其生平踐履大類慈湖方石坡之官平江也朱侍郎任知府事征輸鹽課急迫牽連拘繫甚繁石坡力爲請寬不得乃挾行牀至獄中願與四明談助

卷四十五

三十五

所拘繫同處侍郎不得已縱遣之論者以爲石坡不愧其師而侍郎有慚其父其所請絕虜選將諸奏皆名言也嗚呼慈湖之心學苟非驗之躬行誠無以審其實得與否今觀石坡之造詣有爲有守豈非眞儒也哉慈湖之一綫寄于是堂桂氏子孫其勿替此家風也

花瓶山

縣東二里居縣震位山峯高聳直峙屬木曹志山去東懸嶺一里形勝志云治之左爲上午壘東嶺出其腋又左爲花瓶峯馬壘山清道山抵夾田江伏脉亂流爲管山居于巽隅

清道觀

縣東南三里唐天寶五年建後廢宋紹興間道士葉景虛重

建尚書樓鑰扁其門曰列仙游觀元至元間燬後重建山門之東塔山之阿舊有東山道院爲雲水往來息肩之地崇奉眞靈像扁曰眞聖觀後圯并于本觀明洪武二十四年收併至道崇壽二宮道士立爲叢林王志靜重修成化志歲久朽壞成化四年道士吳以誠重建其東一室曰天開圖畫面江帶野境最幽勝其山多鬻于民間萬歷二十年署篆郡丞龍德孚或贖或勸諭而歸之本觀焉曹志

### 蓬萊軒

清道觀左臨坡負崖上屏密竹下多桂柚葳蕤之植清曠幽邃舊爲道士煉眞之室故名蓬萊久圯明代建後又圯國朝康熙丁卯道會張繼祖改建爲樓塑文昌像于樓上曹志

### 四明談助

#### 卷四十五

三十六

### 花嶼湖

縣東南十里唐貞元十年刺史任侗修築後屢廢屢復至明永樂間定海衛軍陳詳等請復爲田七年以洪武間原定畝數一十三頃九十畝零起科輸糧湖遂廢曹志

### 休休亭

慈人馮景茂嘗下鄉督農中途遇驟雨有一婦哀求附傘馮曰吾雖不忍汝霑濕然嫌疑當遠委傘與之而自跳入民舍後乃于其地割田一方立石亭使行旅雨暘有所休蔭題曰休休亭夜夢神語之曰爾有陰德與爾三銀帶後生子彰武昌同知孫安江都知縣曾孫震御史亭在縣東五里之八都

曹志

東鄉龍怪

康熙三年七月慈谿東鄉顧家街于當午時忽風雨驟至木石俱拔一村廬舍蓋藏頃刻而盡磨礮確臼皆懸之樹上

曹志

青蓮聖蹟

縣東湯山僧遂端窆處遂端本姓張氏祝髮于普濟寺朝夕展誦法華咸通十二年示寂口吐青蓮七朶異香滿室觀者如堵窆于湯山之麓至今五月朔日禮法華經卽其示相顯化之日也

曹志

馮氏天益山房

馮元仲字次牧少爲諸生卽薄時文不足爲專攻經史亦學爲古文詩歌檢討汪文毅偉疏荐至京下吏部問弭蝗策

四明談助

卷四十五

三十七

元仲歷數撫按守令闔帥大臣中貴賄賂養寇干政之弊皆比之蝗而以孽蟲災害非根本不足問畢其說剖臣駭其狂直讀卷者至吐舌不能收因黜授縣丞辱之不知元仲固不屑就也歸而隱居東郊之湯山改名天益鑿山爲洞通往來藥欄荷沼手自經營取前人未刻書及米趙諸家墨蹟雕鏤精好又取古名墨按法製之一時東南名士欽其高行皆慕與之交而天益山房書墨遂名天下後家業中落園亭鞠爲茂艸元仲亦無幾微屑意時取逋券糊綴窻櫺或出遊則敝衣箬笠露胸散帶行道中間與人談黃漳浦倪文正諸先生遺事輒語不得了人無不厭苦之者蓋前輩風流盡矣

曹志

次牧爲湖廣布政叔吉之後叔

吉饒于財有別宅在府城千歲坊後歸林氏見第十三卷  
塔山

縣東南三里邑之青龍山蜿蜒南行盡于夾田之北志曹  
管山亭

縣東南五里居縣巽位明萬歷間令顧言于山上磬石建亭  
爲邑之文筆峯極江山之勝傍有文昌祠有司春秋致祭志曹

管江卽文亭後江宋制使吳潛市民田開浚事見四十二卷  
邑東外護又有鄮山驃騎山其脉東北行交鄞鎮二邑界

鄮山

縣東北十里宋元時貿易之地故名志曹此非鄞邑之鄮山

驃騎山

四明談助

卷四十五

三十八

縣東二十里舊名古靈山山之西峯聯聳如馬鞍又名馬鞍  
山乃府治後鎮山也志曹山以漢時張意爲驃騎將軍故名元  
僧曇噩有賦見成化志驃騎山脉東南至夾田橋東北直至  
鄞之江北岸青墩爲府治後托

驃騎廟

會稽典錄云漢世祖時張意爲驃騎將軍其子齊芳歷中書  
郎退隱于勾章之靈山採山釣水以自適人皆賢之沒而祀  
焉遂以其父之官名其廟有十龜潭在山頂志成化

靈山神庇佑孝子

馮孝子履祥字君德自幼警悟好讀書補諸生嘉靖丙辰四  
月倭賊犯縣孝子隨父出奔賊逼斷父左手且裂其背孝子

以身蔽之訴曰無害吾父寧殺我賊竟刃之死其妻袁氏遁于靈山時孕已彌月夜夢神告曰爾夫爲父死不可使無後吾當與爾一子產時無恐次日果生男復值倭寇將入馬皆止策之亦不前賊不越境而回一方稍輯人謂靈山神庇之蓋孝感所致云

曹志

里社鳴

成化四年慈谿縣東北山鳴隱隱若雷乍大乍細迤邐至南而盡已而東北一區舉賢科十餘人傳云賢人出里社鳴

曹志

保國教寺

縣東二十里始建于唐名靈山會昌中廢廣明元年賜保國額宋治平元年改精進院今仍名保國

成化志

保國寺藏在山

四明談助

卷四十五

三十九

腹從溪邊石徑盤曲而上松林陰翳至半山亭少憩再上數折入山門殿宇修整花木楚楚寺僧殷富頗知禮教

翁洲丁鶴年詩

一徑野雲深僧房闕綠陰雨腥龍出澗風勁虎過林澹泊資禪味清涼養道心三生如不寐石上一來尋

文溪

相傳爲文種故里因以名溪一云溪受衆山之水清瀉成文故名

曹志

靈山廟在山巔廟右山凹處有小嶺通文溪溪上設

閘閘外合香山諸水統閘于李磳以溉田

文大夫故里

越大夫文種字會鄞人越滅吳其謀居多見越絕諸書旣以

伏劍死越人哀之葬于重山一年其神去與子胥共出沒江海間晝夜兩至今浙水之潮前揚波者伍子胥後重水者大夫種里中王深寧先生論之曰世多以大夫不能從五湖游謂不知幾不知保身義也致身亦義也使種蠡並逝國誰與守且蠡楚人可以去越大夫卽越人妻妻遲遲不忍去父母之邦忠臣之志也斯可謂善論古人矣甬上耆舊傳葬越之臥龍山今山亦以種名聞志節錄王深寧贊曰彼脂韋者自詭明哲謂不如蠡謀身之拙工于謀國匪曰爲身論士賢愚不以死生

辨大夫種非鄞產

節錄鮚埼亭集

浙河以東人物莫備于會稽典錄其于鄞人自大里黃公始

四明談助

卷四十五

四十

南宋王深寧黃東發始據高誘呂覽注以大夫種爲鄞產而予則有疑焉越絕書外傳曰范蠡要種入越越大夫石買曰客歷諸侯渡河津無由自致殆非眞賢然則種非鄞人矣吳越春秋內傳曰句踐賜以屬鏤之劍歎曰南陽之宰而爲越王之禽然則由種將死之言攷之益非鄞人矣又攷吳越春秋注中亦引高注則曰大夫文種字會楚鄒人然後恍然曰鄒與鄞字皆從邑或相近而譌也

文溪顏提學第

顏鯨字應雷兒時受書卽慨慕聖賢之學中嘉靖三十五年進士授行人擢御史出視倉場奸人馬漢怙定國公勢貸子錢漕卒償不時則沒入其糧鯨立論殺之四十一年畿

輔山東西河南北大稔鯨請州縣贓罰銀毋輸京師盡易粟備賑且發內府新錢爲糴本帝悉報可明年出按河南伊王典楨怙惡久結掖廷中官嚴嵩父子內外應援鯨欲除之時嵩已敗鯨奏記徐階說諸大璫絕其援乃會巡撫胡堯臣劾典楨抗旨矯詔僭擬淫虐十大罪帝震怒廢王爲庶人兩河人鼓舞相慶景王之國越界奪民產爲莊田魏國公亦佔產樹碑假名欽賜鯨擒景藩用事者五人伏法仆魏國碑戍其人改督畿輔學政以劾都督朱希孝亂法帝怒責鯨詆誣勛臣貶安仁典史萬歷中以湖廣副使致仕劉宗周謂其有見于萬物皆備之體故所至樹立磊落如此

詳曹志

四明談助

卷四十五

四十一

李磳

縣東三十五里瀦文溪香山諸水以溉民田宋寶祐五年制使吳潛甃以石立四楹分五眼上跨石梁外障江之鹹潮內限河之暴溢元大德四年重修曹志其水上通莊橋跨塘更樓化紙閘經靈山下出夾田橋直達文亭江旱時潮從文亭而入水淡可以灌田磳旁有堰春季築實以資灌溉秋季開通以利舟楫至今不廢舊制此外有茅砧磳見四十二卷餘不盡錄

青林渡

縣東南三十里曹志距李磳十里對渡卽鄞之彎頭

寶慶講寺

慈邑東南三十里宋端拱二年僧宗定建名青林菴後名西  
資菴開禧間僧廣清闢而大之嘉定十五年賜今額元至正  
四年燬八年僧肱曲江重建

成化志

寶慶講寺碑記 宋王應麟撰詳成化志

觀音殿碑記 宋黃震撰

青林山寶慶院創自開禧丙寅距今德祐改元已七十年中  
更大參政攻媿樓公題其額中書厚齋王公記其事凡所以  
恢張藻飾之者已極名勝之選他不俟贅詞矣主僧曇華新  
造觀音殿成介進士虞君亨父復請予爲之記是豈可已而  
不已者哉蓋聞佛氏以寂滅爲教凡吾耳目口鼻四肢百骸  
之身與吾父母妻子君臣上下之倫及吾耕食鑿飲生產作

四明談助

卷四十五

四十二

業凡所藉以資生之具盡欲屏除之故樹下不敢三宿恐成  
恩愛惟行道乞食以畢餘生一入涅槃了無所有此寂滅之  
說也後之爲佛者不能盡然仍奉養以愛色身仍眷聚以代  
骨肉仍頭首綱維以效君臣上下仍田以食仍室以居視世  
俗殆無以異甚者視世俗反加侈大往往與寂滅之說正相  
背馳故人或得而議其後惟觀音之在佛氏號大慈大悲水  
旱必于此禱疾痛必于此告凡有求而不獲者必于此依歸  
名以靈感人無致議故僧廬佛舍千窻萬宇必待觀音殿成  
然後稱大脩蓋今佛氏之號召人心莫切于觀音矣然感人  
必以其心修身必以其實其或跡自跡心自心崇飾自崇飾  
作爲自作爲觀音自觀音而我自我則觀音于我何有哉是



必真不殺真不貪真不嗔真不作諸惡真能大慈大悲如觀音以勸里人皆不殺皆不貪皆不嗔皆不作諸惡皆能大慈大悲如觀音則觀音不在觀音而在我不在我而在衆善人之心譬之一水一眼一日一月千水千眼千日千月處處應現無非觀音豈必真珠瓔珞像設于淨瓶巖石之間爲觀音夫然後水旱禱必應疾痛祝必瘳凡所求者必獲是信乎其靈感是信乎足爲佛氏解後議是信乎可無負今日建觀音殿之初意雖然亦豈待他求而可哉慈悲卽吾心一念之仁在反求而擴充之爾

下詳邑外自北而西而南諸勝

雞鳴山

四明談助

卷四十五

四十三

慈邑西北二十里一名仙雞山上有石枕石床石瓶旁有石如雞有石櫃山在雲湖之西形如櫃

寶慶志

雲湖慶安院

慈邑西北十五里周顯德四年置名保安宋治平元年改今額院本以湖得名今湖廢矣院之前有古松夾道綿亘數里望之如雲其一最巨而奇邑長沈時升有造舟之役將斤斧焉里士文學馮輓作詩止之賴以不伐詩云寒松一榦老蒼蒼古寺門前歲月長匠伯偶圖舟楫利禪翁方患斧斤傷得全此日同齊櫟勿翦他年比召棠可但與公期久遠相將俱

列大夫行

寶慶志

大寶山

縣西一里居縣兌位員而雄秀屬金志曹山去西懸嶺半里嶺上觀慈邑山川會成逆局正正堂堂勝于他邑人傑地靈故人才亦勝于他邑形勝志云治之右爲黃庫壘爲大樣山西嶺跨其肩又南爲大寶峯而鵬山奠于辛位

大寶泉 蒙亭

縣西二里大寶山之麓泉甘色清宜茶宋紹興間令陳良翰建亭于上名曰蒙亭今圯志曹

父子進士坊

西郭門外爲劉安劉志業立志曹

劉世龍字允卿正德十三年進士授太倉知州直指詭詞索錠世龍竟以錠進立卻出之遂誣奏降改國子助教遷南

四明談助

卷四十五

四十四

兵部主事時大禮議起黠者假爲捷徑而廷諍諸臣放廢不收壽寧侯張延齡方待決工役繁興世龍懷忠欲發會南太廟災遂應詔陳三事所言皆直陳時政疏入帝震怒械繫至京下詔獄拷掠獄具復廷杖八十斥爲民穆宗登極錄用建言諸臣而世龍老矣卒之日族人爲治衣冠葬之詳曹志

劉安字汝勉嘉靖五年進士授南工部主事改河南道御史入臺甫一月疏陳補君德以圖治安有人君貴明不貴察等語帝閱疏大怒逮赴錦衣衛拷訊兵科給事中胡堯時救之并逮治獄具謫堯時攸縣主簿安餘干典史築隄數十丈人稱劉公隄再遷長沙同知平寧鄉寇有功賜

金幣擢知鳳陽府治行卓異賜正三品服旋丁內艱歸宦  
遊十四載家無長物布袍蔬食處之怡然 子志業嘉靖  
四十四年進士清介自勵累官江西副使詳曹志 安之孫悌  
家貧事瞽母以孝聞見孝義傳

劉憲寵字抑之萬歷二十年進士歷遷禮部員外郎時神宗  
儲位久虛廷臣以國本建言者皆遭嚴譴一日傳旨冊立  
冠婚禮官急具儀上復留中諭更期舉朝洶洶莫知所措  
憲寵力請政府封還詔旨儲位遂定累遷光祿少卿請告  
歸光宗立起僕少遷右通政與魏忠賢忤力請致仕崇禎  
時贈工部侍郎 憲寵祖津事母先意承志終其身不怠  
以母節旌表父廷寅祇服庭訓曲盡子道以子寵貴贈如

四明談助

卷四十五

四十五

子官

詳曹志

西郭趙氏

江山會秀坊在西郭門外爲尚書趙文華立

曹志

趙尙書文華

爲鄉人所惡郡邑志俱不立傳今演鳴鳳記傳奇形容趙尙  
書諂奉嚴嵩意態鄉人醜之故其族禁演鳴鳳戲尙書先世  
祖偕字子永元時山長學者稱寶峯先生有寶峯集

趙珽字禹圭崇禎元年進士由工部主事歷陞河間兵備僉  
事河間當旱蝗後民多死亡珽捐俸市粟賑之賴以活者  
甚衆十五年閏十一月 大兵臨城城陷珽與知府顏孕  
紹同知姚汝明知縣陳三接皆死之珽一家十四口無一

免者

曹志

鳧磯驛

縣西南一里唐開元間令房琯建地臨江渚鳧雁羣集故名  
宋時屢廢屢修凡邑令遷官得代者出居于此俗呼行衙元  
至元間撤屋蓋萬戶府明嘉靖間令陳褒即其地為房公祠

詳曹志

句餘土音賦房太尉鳧磯驛

詩話周鄞江曰驛中向有太尉題額其書閒放絕塵

草堂謂杜甫

推太尉始終如臯夔其于陳濤役亦復無恕詞乃

知古論人原不掩醇疵載攷深寧書

困學記聞

表章司空詩謂司空圖

由來再造功妙算寔首資及觀鶴山集

魏了翁所著

所論頗反而

永王

謂永王璘

曾出鎮轉興南國師惜哉深寧翁未及一見之撥

四明談助

卷四十五

四十六

亂雖非才清望終難訾吾鄉慈水上太尉嘗牽絲仁風江浦  
滿遺愛郵亭垂曾聞五雲筆妙灑蒼松姿五雲歸何處郵亭  
征馬嘶雁亦不復下鷗亦不復嬉

周鄞江記語

茫然飛鳥跡惆悵

鄞江詩

鄞江西休先生有詩

鵬山塔

鵬山在縣西四里居縣辛位嘉靖間令霍與瑕以兌方稍陷  
甃石建亭于鵬山之上高壯宏敞舟行數十里外即望見之  
曹志縣南十里有赭山居縣離位色赤屬火已見四十二卷

邑西外護自長溪嶺分出南行有雙頂城門等山

長溪嶺

縣西北二十五里溪行可五六里許北適鳴鶴鄉

曹志

上有菴

元延祐間僧覺蓮建志成化長溪嶺南水出浮上橋經島磯驛  
至三七市入丈亭後江嶺北水通鳴鶴鄉等處出沈思橋南  
行數十里入陸家埠大江兩水之中有資西寺并雙頂城門  
等山

### 資西教寺

縣西北二十里宋寶祐中建志成化自資西至浮上橋十餘里  
山無雜木但植梅樹花時香雪如海實爲大觀

### 雙頂山

縣西南七里兩峯並峙屹立平野再西南八里有城門山巖  
巖峭壁孤立江濱宋城門校尉會稽陳詠葬于此志成化

### 勾餘村

### 四明談助

### 卷四十五

四十七

勾餘之山無草木多金玉山海經縣西南二十五里舊稱勾章

餘姚相接故名志成化

### 首登元輔坊

在丈亭江南爲大學士袁煒立曹志

大學士袁煒字懋中嘉靖十七年會試第一殿試第三授編  
修進侍講久之簡直西苑撰奇詞最稱旨歷遷禮戶二部  
尙書入閣典機務累加少傅太傅建極殿大學士疾篤請  
告歸道卒贈少師諡文榮煒才思敏捷惟與徐階不相能  
故沒而得下諡然煒亦頗留心桑梓疾苦慈運糧故輸廣  
積倉航海險遠又諸倉場徭役之隸餘定者皆借派于慈  
自丙辰倭難始成城民力倍困邑人陳文誼走闕下陳便

民之事煒從中主之得允其請慈民蒙利里甲捐貲置田

春秋祀焉

詳曹志

慈邑江南諸山自西而東至西渡鸛浦等處交鄞界

三女山龍山

又名雨徽山

蜀山石門岡山車廐白巖戍溪大隱黃墓

等山俱四明發脉支隴已詳第二卷文亭前後江文亭館夾田橋城山赭山管山江西渡新渡鶴浦等處因總錄三江達海已詳第四十二卷

慈邑幹脉自西而北而東交鎮定諸勝

泥橫山

縣西北一百里俗名掘泥山在大海中今連大岸

曹志

西四明

脉自餘姚澣山經鳴鶴鄉浚海東行起五磊五峯轉南逆入

四明談助

卷四十五

四十八

結慈溪縣其支隴先起海中泥橫大小忌諸山幹脉仍浚海東行一起達蓬山度雁門嶺至鎮邑一起鎮邑伏龍山度海至舟山

大忌山

縣西北八十里下有暗石舟帆往來所忌舊在大海中今近岸又有小忌山與大忌山相峙

曹志

向頭山

慈邑西北入十里海濱亦名西龍尾東望伏龍山與龍頭邇龍頭以東屬定海龍尾以西屬餘姚各有海塘塘每爲潮所損二山扞潮其中漲塗與山相接古有海塘石柱屹然中存今盡爲魚鹽之地已成畝畝者禾黍菽麥相望昔以海邑之

衝欲于此置寨屯兵尋以舟楫難于出入故寢寶慶志  
後海塘

縣西北六十里舊有塘三十里以限風濤去岸三十里據海中黃牛桑嶼二山與嘉興海鹽爲界又一在縣東六十里貫鎮海境亦濱于海有塘具存曹志

遐追山

遐追山二廟碑記畧鮚埼亭集

吾鄉慈谿縣東之三十里有遐追山東西二峯對峙其上各有廟山中人亦莫能言神之本末考明成化楊氏府志引宋乾道張氏圖經曰五代末有鮑侍郎約相錢氏宋初勸以納土胡毅劉鋹皆言不可錢氏計定胡劉逃竄海上錢氏使人追之不及遂隱是山終老其時錢氏以詩懷之曰東遐追兮西遐追鮑約何如罷釣歸海上人廟祀之于是知是山得名因茲二人之故真人出而天下同士各爲主皇天后土實鑒臨之雖興王不得而強也

勾餘土音胡劉二義士遐追山操

詩話胡毅劉鋹爲吳越王爭納土事固不量力然各爲其主不可謂非錢氏之忠臣也慈水東遐追山祀胡西遐追山祀劉近人失考而以二廟皆祀勸降之鮑約謬矣

夾馬真人兮馭茲八極日月出兮燭火其息十國游魂兮以次喪職以小抗大兮良不量力士各爲其主兮我懷不懌恥奉降箋兮亡國之戚三王有知兮重泉惻惻東西遐追兮荷

四明談助

卷四十五

四十九

吾君之德臣不返兮非君是愬臣身雖去兮臣心未逃

香山

縣東北三十里記云巖谷流香山多香艸卽大蓬山支瓏

香山教寺

縣東三十五里唐大寶中僧結菴廣德二年常寂大師惟實  
建爲寺名智度大歷八年刺史裴儆奏改今名

圖經參  
曹志

明州香山寺志序畧

南雷文定

己酉十一月來遊達蓬續宗上座出其所著香山寺志求予  
爲序燈下展閱鏗然橡栗墮瓦不異李五峯宿石梁時又念  
頭顱如雪遠遊志願何可必遂不如一邱一壑光景絕可憐  
愛耳此山東臨滄海多海市秦始皇嘗駐蹕于此以其可達

四明談助

卷四十五

五十

蓬萊故謂之達蓬山封禪書言三神山去人不遠諸仙人及  
不死之藥皆在焉而黃金銀爲宮闕望之如雲及至三神山  
反居水下終莫能至云頗怪此等妄談不可以欺愚者以始  
皇之明察方士焉能以鑿空烏有之事令其聽信吾至此山  
而所謂黃金銀之宮闕居人無不見之然後知方士之言未  
嘗無所據也始皇卽欲不信得乎蓋登州海市掩映遠山望  
之如雲而此山臨視咫尺闌楯之底其謂反居水下是也嗟  
乎此山培嶁以始皇之力終不能有而二三寂子黃金銀宮  
闕且收之爲籬落間物其亦可慨也夫

後海頭沈氏二忠

地名沈思橋

沈履祥字其旋宸荃字友蓀從兄弟也履祥登崇禎十年進



士授侯官知縣丁內艱服闋補甌寧值明亡棄官遯之台  
州山中兵至被執勸之降不屈死初履祥生時其父夢文  
信國至其家及棄官至台兄穀祥教以易服爲僧履祥不  
可因寄訣父訣兄訣妻訣子諸詩而書其尾曰褲褶密蠟  
異日見予眞性家人不解其語一日其父坐堂上見履祥  
白晝衣緋衣入急呼曰吾兒死矣命穀祥往求其屍穀祥  
抵台州時盛暑皆糜爛獨履祥面如生第身已異處不  
可覓穀祥方旁皇忽憶密蠟語乃盡發諸屍褲得一屍密  
蠟宛然在焉遂合于首殮以歸蓋其志早拚一死者所謂  
信國再來良然矣 宸荃後履祥三年成進士授行人考  
選山西道御史馬阮亂政宸荃連上十餘疏論時政安危

四明談助

卷四十五

五十一

得失持議侃侃最後直糾士英招權納賄蠹國殃民十二  
大罪士英怒必欲殺之臺省合疏救得免遂出爲蘇松兵  
備道益不得行其志未幾蹈海死宸荃性慷慨激烈與履  
祥皆以名節自任至是兄弟並死國難人稱二忠焉 同  
時沈崇瑜字宇崐亦履祥族兄弟也成進士又後宸荃三  
年授金壇知縣其父手書忠君愛民弗玷清白家聲十字  
付之履祥宸荃死崇瑜亦棄官耕于野王爾祿爲巡海道  
以同年生屏車騎至海濱訪之崇瑜稱病不起爾祿徘徊  
門外久之乃長歎而去

曹志

勾餘土音擬薤露詞

詈降將

沈侍御臨刑

汝偕彼鴟張賊我赧王遂恣睢以狂雙旌八騶妄叅佐命  
行我欲食汝肉天不我襄汝欲喪我節天不汝降我不畏  
死任恣睢以狂鴟張謂降帥張杰

詩話侍御按部天台爲田雄張杰二帥軍所執不屈死  
之

南日沉 沈閣學失風

夙負精衛心遂成精衛恨狂風逐雲生驚濤喚雷震舟人  
夜失維此意憑誰問重耳未言歸介子已先殉可憐綿上  
火乃借天吳刃飄流已六年一死早自信埋魂南日山尙  
較二陵近

詩話彤菴相公覆舟皆謂出定西侯張名振之手然定

四明談助 卷四十五

五十二

西專主則有之謂遽若鄭彩之害熊公或亦未可以爲  
盡然也予故假彤菴臨絕之語以存疑

大蓬山

東北三十五里又名達蓬山山上有巖高五六丈有石穴深  
四丈餘巖上有佛迹多香艸秦始皇至此欲自此入蓬萊故  
號達蓬山 佛迹巖在達蓬山之頂懸崖絕壑石壁削立而  
壁間有三佛迹在焉 鬪雞石在達蓬山間高五丈左右二  
嵯岬立對峙如鬪雞之狀 寶慶志

雁門嶺

縣東北四十里通龍山千戶所 曹志 龍山西連觀海衛北瀕海

屬鎮海縣詳下卷

四明談助卷四十六

四四明山脉歷餘上二縣至鳴鶴鄉慈水諸境已詳于上其自雁門嶺交鎮海者先起龍山經澥浦澤山梓蔭山結縣治縣學城內外歷叙理學名賢并古跡凡江以南諸山屬東四明者已詳于前不再錄祇錄黃崎江千丈塘施公山伏龍山後海塘正覺寺大浹渡巾子山張太傅祠候濤山觀海樓威遠城所有事物詩歌隨地並載其自伏龍山渡海交定海者歷岱山秀山黃楊尖山馬鑿九峯石嶺岑江紫微雙髻鎮鰲等山結縣治縣學城內歷叙古跡并明季殉節名宦名賢城外錄關山觀山道隆觀并泔海十六鑿諸山西大洋懸海有三姑長白金塘冊子瀝表螺頭等山東大洋懸海有大衢長

四明談助

卷四十六

一

塗東霍蘭劍石弄梁鴻馬秦桃花六橫馬蟻等山所有事物詩歌隨地並詳于後

龍山所

龍山背海面山左亘覆船山右爲望海距郡北七十里明洪武間以定海縣龍頭塲石塘團之址建置今所廢屬鎮海營城守官兵駐防

曹志

澥浦

縣西北六十里卽古之渤澥浦西有崑崙山東有渤澥島漁舟聚集之處外通大洋有澥浦行宮宋乾道六年建

成化志 山

突出海中民居頗盛多漁戶

澤山

西北九十里舊稱櫟山宋禮部郎官黃震以不雅改今名志成

黃文潔公震字東發登寶祐四年進士由吳縣尉歷史館陞守撫州決疑清訟赫如神明時朱徽公設社倉後多弊公

曰法在三代猶宜損益青苗法減息濟民非不善也弊卒不可救今社倉弊亦然遂買田以代其息撫人德之後提舉

浙東常平陞直寶章閣國事日蹙歸隱每閱經書子史辨論精要名曰黃氏日抄共一百卷行于世及卒門人私諡

日文潔志成傳兼見廿一卷日湖寓亭

黃叔英字彥實文潔公子少負異才邃于經術嘗爲和靖采石二院山長生平敦尚氣節故其文峻拔偉麗而卒能弗

四明談助 卷四十六

二

畔于道人以爲稱其爲人亦稱其家學云詳曹志

黃玠字伯成文潔公曾孫隱居教授孝養二親渡浙而西喜嘉興山水卜築弁山遂號弁山小隱子純裕字熙安精

于齏政明初爲龍頭場管勾凡煎辦之事至今賴之曹志

澤山書院 節 鮎埼亭集記

東發先生本貫定海其後徙于慈谿晚年自官歸徙居定海靈緒鄉之澤山榜其門曰澤山行館其室曰歸來之廬已而僑寓鄞之南湖已而遷寓桓溪自署杖錫山居士已而又避地同谷然先生沒後其子孫多居澤山者蓋先生慈谿舊宅在鳴鶴鄉之古窰去澤山甚近故也元至正中學者建澤山書院以祀之其去行館十里不久而燬黃氏後禮之復建焉

今廢矣日鈔舊槧藏于院中亦不復存予謂當復行館之址而以澤山書院名之以從先生之舊定海諸公皆以爲然請予記之先生講堂在山南望江阻海環植松菊最稱一方之勝王翔龍詩所云高風河影動斜月竹身寒潮海秋聲闔山林客夢安是也然其爲定海重不在此朱徽公之學統至咸淳而後北山魯齋仁山起于婺先生起于明所造博大精深徽公瓣香爲之重振婺學出于長樂黃氏建安之心法所歸其淵源固極盛先生則獨得之遺籍默識而冥搜其功尤巨試讀其日鈔諸經說間或不盡主建安舊講大抵求其心之所安而止斯其所以爲功臣也西山爲建安大宗先生獨深惜其晚節之玷其嚴密如此婺學由白雲以傳潛溪諸公以

四明談助

卷四十六

三

梓蔭山

縣東一里宋軍官馮柄夷建屏山堂于上後燬山下峻石刻王安石懲忿窒慾四字志成化明宏治十二年縣令錢如京建迎秀亭嘉靖己亥令王文貢改名凝秀縣治東半里有印山地面湧起一石如印曹志形勝志云縣城當水陸之要會鄣衢後所阻其南龍山管界殿其後蓋不獨五縣之保障實東浙

之藩垣也又云四明脉至浹口之南分太白餘條東北走爲竹嶼青嶼樂家嶼入海爲蛟門虎蹲雄據上流足稱天險其北本四明西北之支度鄞而慈入縣界爲達蓬伏龍由是循沙而行奠位浹口之北爲招寶此山形之概也

### 鎮海縣

周爲越東南境地秦置鄞縣地在其封內歷漢吳晉宋齊梁陳無改隋爲勾章縣地唐復爲鄞縣地憲宗元和中置望海鎮于甬江之口今大浹江口不隸明州昭宗乾寧四年錢鏐據有吳越改望海鎮爲靖海鎮因置望海縣隸明州梁改名定海宋因之神宗熙寧十年割鄞鄞卽之海宴太邱靈巖三鄉益縣南境元豐三年又割縣之金塘鄉隸昌國元無所改明

### 四明談助

#### 卷四十六

四

太祖洪武十七年廢昌國縣并于定海

惟存在城五百餘戶附本縣

國

朝康熙二十三年展復海界 賜舟山名定海山遂後以名其縣而改定海爲鎮海縣東連招寶南環以江北負大海距郡東六十二里城廣九里闢爲五門東曰鎮遠南曰南薰又南曰清川西曰武寧又西曰向辰北際海築塘不設城城建于吳越錢氏歷元而隳明洪武元年始立木柵七年易以石二十年信國公湯和建衛拓而大之闢門六舊穴水門于城西改置于小南門之右曹志歷代治縣官制并賢令傳詳郡邑志 鎮邑爲鄞慈奉水口以招寶山作下關特健水出城西南落大浹江繞東歸大海

### 鎮海縣學

學故在縣東宋雍熙二年主簿李齊始建聖殿于其地崇寧中詔天下立舍法因增廣學宮建炎四年燬于金兵紹興間令章汝翼改建縣東北慶元初令韓永德復建大成殿歷三令始完明倫堂久圯令商逸卿鼎新之邑人胡大任黃君中亦益地拓學嘉定間令崔端學勅立四齋及兩廡廩庫壘石爲泮橋設重門于橋之外歷元明修廢不一崇禎元年八月文廟爲颶風所摧巡海副使蕭基知縣龔彝謀改建邑人薛三省考卜面向重建大成殿兩廡戟門并移鄉賢名宦二祠于戟門左右薛三省爲之記至六年 文廟成越三載巡撫喻思恂巡海至定議新明倫堂尊經閣時廟徙後故址四丈尺前隘于地邑人某主議改建高樓上爲尊經閣下爲明倫四明談助

卷四十六

五

堂高廣與廟制等并建兩齋于廟左右 國朝康熙四年七月颶風淫雨壞殿宇神位露處六年縣令王元士捐俸多方勸輸屬教諭徐友貞江溥先後董其事踰二年落成惟 啓聖祠傾圮多年春秋祀于明倫堂十七年教諭趙時楫捐俸募助重建

曹志

歷代養士科條并賢師儒傳俱詳郡邑志

魯國孔林碑

天下至寶錄載鎮海學宮有魯國碑蓋數千年物也遍尋不得得于學署作砧石裂其四角表而滌之置之聖殿內

曹志

鎮邑人物里第未詳不脩載祇載理學名賢于後

曹氏世學

曹長史粹中字純老宣和六年進士爲李莊簡光堦秦檜在

相位光時爲叅政檜知其名欲識之粹中辭不赴光後貶海南粹中不復仕張魏公力荐于朝通判建寧府曾孫孝先李全叛楚州死之孝先之子說字習之刻志問學五經有解平生無喜愠嘗戒學子絕人我則天理自著學者尊爲泰宇居士

曹志

鮎埼亭集曹放齋詩集序云先生釋褐黃州教授時莊簡由吏部尚書叅預機務秦氏勢甚殷聞先生名欲見之先生辭焉私語婦曰尊公其能終爲首揆所容乎何不早去已而莊簡果被出歎曰吾媿吾壻自是先生隱居終秦氏之世未嘗求仕莊簡退居著讀易老人解說而先生箋之各以其所長治經張魏公晚年入相薦于朝通守建寧不四明談助

卷四十六

六

久乞身而歸贈侍講深寧王氏解詩多有取于先生之說而完書則竟不可得見矣忽見永樂大典中有之乃鈔而謀付之梓因想少時讀深寧四明七觀其于經學首推先生之詩說今幸得拜而讀之奚翅南金不徒桑梓敬恭之思也

沈端憲首明陸學

沈端憲煥字叔晦自定海徙鄞入太學行藝優諸生始友臨川陸先生九齡一日盡舍所學以師禮事焉乾道五年進士第與朱文公呂成公問辨凡學業無不畢力爲太學錄不肯詭隨以取光寵遂補外終于舒州通守特諡端憲

成化

志傳互見十八卷竹洲寓居



余忠惠世篤孝友

余忠惠天錫字純父昌國人登嘉定十六年進士初爲史相府童子師彌遠器重之天錫試于鄉秋告歸彌遠語之曰今沂主無後里中宗子賢厚者幸具以聞天錫渡浙抵越西門天大雨過全保長家避雨保長知其爲丞相館客具雞黍甚肅須臾有二子侍立天錫異而問之全曰此吾外孫趙與莒與芮也日者嘗言二雛後極貴天錫因憶彌遠言還臨安以告遂召見彌遠善相大奇之遂留與莒天錫母朱氏爲沐浴教字禮度益閑習未幾召入嗣沂邸迄卽帝位是爲理宗不數年叅知政事復守鄉郡母夫人壽九十將以壽日拜天錫爲相以病卒贈太師諡忠惠弟天任

四明談助

卷四十六

七

爲兵部尙書兄弟友恭方貧時率更衣以出終歲同衾及晚貴盛復約以昭穆同葬子作賓尙賓能守孝謹成化志傳互見二十六卷錦樂坊余氏下

黃文潔始興朱學

黃文潔公傳見上澤山行館下曹志言明州白慈湖倡道知有陸學而不知朱學朱學之興蓋自震始

蔣員外積善獲報

蔣員外定海人逸其名仗義矜節子姓不類鬻田產者必隨其賈市之迨久度其無以自給舉以還之不責其償已而又賣旣買又還有至數四者卒無厭意嘗泛海欲趨郡爲回風所擊溺水舟人挽其衣救之不可得舟行去溺所約

十里許遙見一人冉冉立水上隨風赴舟視之乃蔣也急取之問所以曰方溺時覺有一物如蓬藉吾足適順風吹送故得至人以爲善積所致云

成化志

張侍講閱卷不阿

張侍講信字誠甫洪武二十七年進士第一人授翰林院修撰遷侍講拾遺補闕直聲震朝宇三十年會試上命學士劉三吾爲考試官所取盡江浙閩人中原西北無一預者謗議騰起上怒命儒臣覆試信與六七翰林官受命閱卷或曰上方震怒宜少貶以承上意信不可仍以三吾所取中式卷進上益怒謂此屬皆胡藍黨三吾坐謫戍信輩棄市人咸惜之

曹志

洪武甲戌科三鼎甲皆出于四明且皆死

四明談助

卷四十六

八

忠直狀元張信定海人以閱卷不少貶而死榜眼陳忠鄞人死于遜國之難探花戴德彝奉化人官拾遺靖難兵至抗節不屈死

義門薛氏徙定海

薛三才字仲儒萬歷十四年進士授庶吉士歷至都給事中數言事尋遷荆西左布政使會楚宗人華樾以假王事擊巡撫趙可懷至斃勢甚洶洶巡按御史以叛疏于朝三才力言諸宗罪在殺撫臣劫貢物耳非反也楚獄因得不蔓歷陞兵部尚書協理戎政卒于官贈太子太保諡恭敏

志

詳曹

薛三省字魯叔萬歷二十九年進士改庶吉士授簡討及兄

三才卒請告歸天啓四年卽家起少詹事明年知貢舉陞禮部尚書會毛文龍以邊功媚忠賢請宣捷告廟三省持不可遂移疾乞歸疏晨上已刻下落職閒住崇禎改元起禮部尚書疏辭不拜卒贈太子太保諡文介

詳曹志

薛氏義門舊在鄞邑張村後徙南城冷靜街傳俱見二十一卷薛氏義門下恭敏長子士珩有高行傳亦見義門下下詳邑內故蹟逸事

海宴亭

舊名鎮海宋寶慶二年守胡榘改今名在縣西北

曹志

石刻靜廉二字

邑舊有朱子手書靜廉二字不知何年所鐫其書大楷石高

四明談助

卷四十六

九

尺許左旁三字大如掌朱子自署姓名也明崇禎中御史梁某視鹺海上宴候濤山卽景賦詩召工刻石背上今藏侍御

謝兆昌齋中

曹志

銅壺滴漏

數千年物也明初衛官鬻之慈谿慈邑古蹟志亦云後嘉靖時郡道府延工倣式至郡城鼓樓至今不還

曹志

陳御史因夢決獄

永樂戊戌科鎮海陳憲登第未幾選御史出按江西有風裁一婦之夫被人謀死經年未斷乃疑獄也憲按其地因禱于神夜夢神告曰斗穀三升米便問陳宗禮宗禮其字也晨起據案推之見隣里排年姓名有康七思之良久曰殺婦之夫

者得非康七乎其人叩頭請罪卒置之法一郡稱爲神明志曹

陳憲字宗禮永樂十六年進士爲江西巡按御史一切宿弊靡不釐革人謂之陳一掃云 叔父治永樂九年進士清介自持歷官河南按察使僉事俱見曹志

蘭亭頴上本

萬歷辛卯舉人王日華爲頴上令以清慎稱卒于官民尸祝之先是頴治有智井時見火光人疑爲鬼物日華至夜察其光曰中有至寶焉縋之下得石刻黃庭其陰則蘭亭也爲唐臨絹本遂載之歸今世所傳頴上本者是曹志  
天倪生服丹仙去

陳仙人王賓字天倪明之定海人少負異稟詩文書畫無不

四明談助 卷四十六

十

入妙甲申之變先生號咷于野遁跡山中怏怏不自得忽有一道士過之曰吾子誠高士然喪亂之辰恐爲意外之變所折吾授子以藥有急而用之語畢竟去先生亦不以爲意未幾果當厄乃稍稍習之已泠泠然輕舉須臾見洞天瑶艸非復人間道士緩步而出握手笑曰此羅浮也當與君居于此顧先生之家不知以爲死矣一日先生忽降于其里人之庭呼其友來前空中作書告以道士顛末于是其家大驚是時計先生之年猶未踰三十也先生所作詩畫至今里中有藏之者呼爲陳僊人墨跡云節錄結 壻集 曹志稱雷塘公遇洞賓贈藥度爲蓬萊侍史

鎮邑江南諸山自西而東至海中黃牛礁交定界

陳山石門崇邱長山東岡小浹江瓶壺山靈峯孔墅月浦石湫  
三山合巖慈巖盤巖瑞巖柴樓穿山金雞虎蹲蛟門龍洞諸  
勝俱東四明太白支隴脉已詳第四十卷海中牛鼻孔黃牛  
礁二山爲鄞定交界見四十二卷

### 黃崎江

縣東南一百十里自崎頭海洋分派爲支江西北流約半潮  
至蛟門出大海曹志此言象山渡錢倉對港之崎頭在穿山外  
千丈塘

長山碶起至陳華鋪止長四十餘里明嘉靖壬戌邑令何愈  
新築鄞人范欽爲之記曹志塘東蛟門對出爲黃牛礁橫水洋  
等處屬定境

### 四明談助

#### 卷四十六

十一

鎮邑江北諸山自西北至東南其支隴止于招寶山

### 施公山

縣西北九十里地極險要多苦海寇元至正間縣達魯花赤  
張進乃刱建巡檢司以禦之今置烽堠其上曹志

### 伏龍山

縣西北八十里一名箬山其山跨東海西海之門宛若龍頭  
龍尾之形又若龍赴海之狀因名伏龍山內有千丈巖山勢  
壁立爲觀海奇處又有刺史門海眼泉自滿倉石壇乳井產  
榭子木水產紫菜獨勝他所著名伏龍菜餅寶慶志

### 後海塘

縣西北二里起巾子山麓止東管二都宋淳熙二年令唐叔

翰與水軍統制王彥舉統領董珍申府聞于度支降錢米做  
錢塘制疊石甃塘岸六百二丈五尺嘉定十五年接甃五百  
二十丈名爲接塘塘有峻坂捍禦甚固明正德七年海溢漂  
溺民居水利僉事道胡觀增高二塘五尺并椽破浪椿隆慶  
中海溢吞齧塘石無存巡撫谷中虛復增葺外塘曹志  
清水浦

縣西十里舊傳爲湖今漲爲塗曹志再西交鄞縣清泉場灶戶  
在此伏龍山龍尾以西屬餘姚龍頭以東屬鎮海自龍頭至  
此地俱沙土爲鎮邑上沙餘俱塗泥

### 大澗溪

縣南一里卽大澗口爲扼要關舶戰艦處曹志

### 四明談助

#### 卷四十六

十二

### 城外石塘

起南薰門外龍王堂至武寧門養濟院明成化間海道副使  
朱紳脩倭都指揮張勇築嘉靖十年增築至鎮遠門海口曹志

### 巾子山

縣東北八里與候濤形勢相控爲潮水出入之障蔽邑無水  
患者兩山之力非二山障蔽不可爲邑矣寶慶志下有叢塚宋

高宗幸海道侍衛軍赴舟不及多死附埋山下洗馬池側成化

志宋史度宗時水軍統制張世傑次定海元石國英令都統  
卞彪說世傑降世傑斷彪舌磔于巾子山下明嘉靖間于山  
巔建越公祠以祀世傑後祠圯移主于湯信國祠內合祀曹志

### 張太傅祠堂

節錄結埼亭集記

厓山三大忠臣祠倡議于羅一峯成于陳白沙而任之者陶自強也吾鄉候濤山東巾子山爲當時張太傅自臨安入海駐營之地而未有祠并志乘亦不載何其闕也范文虎以伯顏軍至臯亭山太傅請移三宮入海而與文丞相合背城一戰陳丞相以議和阻之太傅遂提兵東渡由慶元抵昌國營于是山其意蓋已辦閩廣再造一局石國英遣都統卞彪說之使降卞彪故降將太傅以爲反正而來從已俱南也椎牛享之酒半彪從容致國英旨太傅大怒斷其舌磔之山中軍士感憤泣下誓共求宗室以謀恢復于是太傅探得楊駙馬以二王至溫陳丞相出會之陸侍郎蘇統制俱赴之遂出蛟關沿海入覲共預定策事而二王之局以成蓋陳陸諸公雖

四明談助

卷四十六

十三

素稟忠赤而非太傅以宿將重兵握其樞則其事不可集顧太傅之所以鼓三軍之氣而扶九鼎之絲者莫過于巾子山之一磔能使燭火重照死灰復然當是時趙孟傳以宗室子舉慶元冊籍獻勾餘城郭黯然無色豈知金鰲背上尙有人焉大聲一呼白虹貫日是丹山赤水所以洗辱而二王一綫得延之自也乃與蛟關父老議立祠以祀之厓山宮闕與是山塹寨相望太傅之神明有不倦倦于此乎

候濤山 水操

縣東五里一名招寶山耆舊相傳山下有蚌生明珠往來波濤之間漁人或得之卽光耀逼人駭浪繼作舟不可行投之乃止

寶慶志

碁子坪在候濤山半山之間有小沙灘其下通海

出石碁子人欲取之先以白米或黑豆撒其中翊日得碁子各隨其色

寶慶志紀異

山之東南峙一小山僅高尋丈名昌國山

潮汐至此分流舟行可達昌國

曹志

陶菴老人張岱夢憶云定海演武場在招寶山海岸水操用大戰船哨船數千艘襍以漁牒輕舠來往如織舳舻相隔呼吸難通以表語目以鼓語耳截擊要遮尺寸不爽健兒瞭望猿蹲桅斗哨見敵船從斗上擲空余水破浪衝濤頃刻到岸走報中軍又趵躍入水輕如魚鳧水操尤奇在夜戰旌旗干櫓皆掛一小燈青布幕之畫角一聲萬蠟齊舉水光映射影又倍之招寶山凭欄俯視如烹斗煮星釜湯正沸火炮轟裂如風雨晦冥中電光翕焱使人不敢正視又如雷斧斷崖石

四明談助

卷四十六

十四

下墜不測之淵觀者褫魄

仙人洞

在招寶山上嘉靖己未都督盧鏜海道譚綸遷補陀寺于此故名觀音洞石壁左勒六國來王處右勒平倭第一關宋王安石筆也令朱一鶚立又大士石刻唐吳道子筆都督侯繼高鑄于招寶山上關帝乘馬像明戴文進筆其立像爲宋馬

遠筆

曹志紀古蹟

鐵牌和尚不言名有云蜀人時持一鐵牌往來城市故名之或服僧衣或爲道裝暑月常服絮袍臘月浴于水崇禎間住招寶山之潮音洞有衣以新衣見貧者旋與之不少吝喜飲醋觴許一吸而盡士子問之曰爲僧何不誦經對曰爲儒何不



讀書曰吾日誦數千言曰能行得一句否日則浪游街衢夜則歸宿山洞一夕坐化

曹志

旌信乾元宮

縣東北五里招寶山下卽東岳行宮宋紹興間道士季知孟

建成化

志

招寶山鐵符

節錄鮎埼亭集記

招寶山本名候濤山以其當海口商舶所經百珍交集因以招寶名之或以爲因山下蚌珠者妄也相傳宋政和間沉鐵符山下按况逵豐惠廟記政和七年四月樓昇造畫舫百舵置海口專脩高麗使臣之用又造二乘舟錦帆朱鬣威耀若神投鐵符于招寶山之海中以鎮之時有巨魚出現長數丈

四明談助

卷四十六

十五

鱗角耀日觀者駭之然則當時所製凌虛致遠凌飛順濟神舟之屬皆在是山下也其鐵符殆林靈素等之所爲道君方崇術士尚符瑞而巨魚之祥守臣以此迎合邀再任特外夷貢使曾未幾至而燕山已塵起矣樓氏晝錦堂世譜特變其說以爲是時海潮坍溢民田乃以鐵符自山投之于海泛濫以定因以名縣不知定海之得名在朱梁時又可見其後人之不學也已

楊文懿遊招寶山

楊文懿公集自記

招寶山在定海城東一里所雄峻特立景泰甲戌秋月庚辰朔鎮海連帥牛侯循有母之喪余從致仕大叅王公士華秋官副郎李公衍往弔旣而衛揮使李侯綱劉侯鎧邀遊是山

壬午日方升五人者皆肩輿出城白沙碧艸彌路抵麓下輿  
攝衣躡石磴迤北數步轉而東始履沙土又數十步得平岡  
茂林衆少憇據胡牀坐清蔭中啜茗飲空翠拂人襟袖禽鳥  
嚶鳴風颺颯爽乍喧乍止令人樂而忘疲坐稍久余欲起觀  
海諸公難之獨劉侯偕余西南行數百步極峻險從者或援  
或推乃躋于巔立斥堠上四向空闊心目開明顧城邑廬舍  
歷歷可數江山林野層見疊出而大海茫無津涯與天爲一  
忽颶風起驚濤拍天作萬雷聲爲之目眩心悸立幾仆少頃  
風止日開乃見遠近諸島殊狀異態不能殫述沙禽水怪浪  
舶風帆出沒于雲濤杳靄間可喜可愕已而東北行且下山  
山將盡處有洞呀然乃微服隨導者魚貫以入洞廣崇殆十

尺苔蘚翠濕若染濤鳴嶼間蕭颯如風雨出洞有老兵迓曰  
諸大人聚菴中伺同燕也還至前坐所北數十步入菴菴隘  
而幽勝前臨澗澗甚澄水艸被白沙文石若組繡可愛其後  
青壁千仞不可上有泉出其中聲鏘鳴下石潭泉味冽且甘  
菴楣榜曰觀瀾牛侯所創也卽席肴蔬雜陳惟魚蟹味異常  
乃新漁者牛侯遣价攜酒饌至將命曰憂不克偕也觴數行  
乃起而去竊憶異時島夷鴟張將卒皆奔走不暇今聖明在  
位海不揚波武臣能優游尚文崇儒而吾儕得與之遨嬉于  
此何其幸也余聞之書江漢朝宗于海凡爲臣者皆必殫忠  
效蓋而居安則防患見危則忘軀若水赴海雖萬折而必東  
此諸公暨愚皆所當勉者抑又聞之天地間惟海最大人觀

乎海則所見極天下之大而莫能尚不獨難爲水而已不觀乎海則雖徧覽萬物無一或遺而所見終小亦猶河伯之自喜耳故君子之學必觀乎聖人而識其大者乃爲至焉此又吾之所志者是用記茲遊焉

謝臯羽秋風上曲

秋風吹水龍上天龍女抱珠海底眠水花生雲起如葑神龍下宿藕絲孔巨鰲鼉鼉鼓隨赤魚鱗鬣陳旂旂海人見此失摻網歸對妻兒月下紡自言移家來磧中十載秋風潮不上老夫一人語門前見此已是開皇年

宗正菴題招寶山石壁

女媧補天餘擲此東海道伸勢若神龍雄踞主羣島俯看勢

四明談助

卷四十六

十七

蒼茫悲來傷懷抱極目夕陽外遠山白如縞顧此耿耿心海風吹人老

盧月船九月十五夜候濤山飲月

客滿船酒滿樽晚潮逆向風頭奔客投山寺愁山黑海月先客懸海門凭闌指點正奇絕頃刻忽被秋雲吞振衣一喝雲倒走凌空孤鏡無纖痕海氣旣澄濟天亦浮蔚藍五人一席踞斗南海若蛟室驚雄談吁嗟乎三秋好月只今夜直到明歲誰能堪勝地勝侶若此不一醉快事只恐難再三簫聲急歌喉酣桂影長夜垂毳毳醉眼瞪瞢復何有惟見遠山閃閃眠金蠶

次曉觀旭

風露無聲怒濤息僧房月床夢不黑天雞喚客躡飛樓曉色  
溶溶添月色點點漁燈漸漸收昨宵豪興今淡極我告諸君  
有奇事月光寒射扶桑艷皎皎白玉宇朱霞吐新鮮素娥故  
按轡絳節趨而前霎時萬壑頓一暗水氣火氣相熬煎赤濁  
黃黑烟燄極晬然一聲海面金盆懸飛潛草木一一含殊彩  
靈光直透毛竅八萬有四千火龍戢威風伯倚扇萬里肅肅  
生晴烟六合新出紅爐圓道人前坐起呵欠雙手揩目神炯  
然一日一月東西天

### 觀海樓

招寶山觀海樓憑閣康熙乙酉歲焚燬曹志乾隆間重建已復

### 舊觀

## 四明談助

### 卷四十六

十八

### 威遠城

招寶雄據海口與竹山相對峙爲郡治之門戶誠保障要害  
處也明嘉靖間鎮守都督盧鏜與海道副使譚綸議以招寶  
俯瞰縣城相隔不數十武賊一登據置火炮其上縣城可不  
攻而破卽倭船絡繹街尾入關我軍亦無以制之故守郡非  
據險不可而據險非成城不可乃請總制胡宗憲于招寶山  
之巔築建城堡東西爲門二內建戍屋四十餘楹名威遠城  
復于山麓西南展築靖海營堡建屋四十餘楹以時教閱于  
大小浹口分布戰艦以嚴扃鑰諸戰守器械畢具曹志  
下詳伏龍赴海歷海中岱秀等山再渡至定海城鄉諸蹟

### 岱山

定海縣北約百二十里蓬萊鄉周圍四百餘里土厚田瘠所  
產豆多穀少以魚鹽爲業宋明時稱極盛支山十五畧十五  
湖一浦三龍潭二塘一硯一 國朝雍正八年移岑港巡檢司  
駐其地曹志嘉慶初廩貢生葉機以糾集鄉勇平洋匪有功議  
叙知縣授江南上海令道光四年陞高郵州建新第于府城  
水浮橋

句餘土音甬上琴操

### 陳大令岱山操

昔年寶峯兮北面受教晝而鳴琴兮夜則講道聖學有真兮  
惟忠與孝詎以城邑兮齎彼羣盜憤彼元帥兮喪其旌纛空  
令下吏兮義憤慘慘洋洋東海兮岱山其隩追擬蘇卿兮困

### 四明談助

#### 卷四十六

十九

于雪窖西瞻寶峯兮靈光有曜不負吾師兮臨流長嘯

詩話慈谿大令陳文昭名麟受業于慈之大儒寶峯趙氏  
楷以傳慈湖之學方國珍軍入慶元獨公不屈國珍執而  
投之海或諫而止乃囚之岱山終不屈而死今翁洲志謂  
公避方氏于岱山者謬

### 雙頭洞山

縣北約百二十里小民捕魚之所附近岱山屬蓬萊鄉曹志

### 秀山

縣北約九十里元縣令趙大忠曾用畧民禦寇展復未久人  
民稀少近馬畧曹志

### 黃楊尖山

縣北六十里多產黃楊故名山有二尖一曰大尖一曰小尖其高相距數百丈東海羣山之望也大尖頂平廣可畝許旁有巖壁立萬仞而下臨無地兩巖間橫一大石長可二丈闊一丈餘方平如几世傳仙人奕處俗名石道地

曹志

### 馬鑿山

縣西北四十里平衍環原隰之膏腴者百餘頃唐開元時議置城邑于此緣南北土磽不果馬鑿中峯之椒有單奇洞相傳昔有單奇修道于此知者挾之操炬入洞不知所往

曹志

### 岑港山

縣西三十里明嘉靖時爲倭寇巢穴展復初築城取石于此堪輿家言係邑之來龍不可鑿尋禁止

曹志

### 四明談助

#### 卷四十六

二十

### 岑港

縣西北四十五里相傳古六國港口爲定海要汛

曹志

### 紫微尖山

縣西北十五里一名宋家尖山盤紆幽秀居民所聚或曰古名紫皮因宋高宗避金人航海至此遂更名紫微

曹志

### 雙髻山

縣北十里有二峯如髻矗立天表諸山環繞爲縣治之主山相傳葛稚川煉丹處有棋枰石磴

曹志

### 鎮鰲山

東海中自北起蜿蜒南走屹爲一峰舊昌國縣址

成化志

城西

北隅雉堞跨其上平巒蜿蜒蒼翠可挹宋元縣州治俱在山

之麓明改建中中左二所今爲總鎮府一名鎖山宋淳熙  
間賜名鎮鰲曹志有望海樓在山上見曹志圖

### 定海縣

周爲越東南境地越滅吳欲置夫差甬東君三百家秦漢至

吳晉宋齊梁陳皆爲鄞封內地隋爲句章地唐復爲鄞地元

宗開元二十六年始置翁山縣縣城東四十里隸明州德宗

大歷六年海寇袁晁亂據鄞翁山久不克復遂廢翁山不治

歷五代至宋神宗熙寧六年始卽故翁山地立昌國縣仍隸

明州岱山負北螺頭在南左擁洛伽右峙蛟關距郡東北二

百六十里元豐二年割定海縣今鎮海之金塘鄉益其地元世

祖至元十五年升爲州復置昌國縣隸之未幾縣廢祇存州

### 四明談助

#### 卷四十六

二十一

明太祖洪武二年復爲縣十七年廢縣爲昌國衛徙其民二  
十年衛遷象山縣之東門改置中中左二所成之二十五  
年改隸定海衛仍于故城設兵防禦永樂十五年都指揮谷  
祥加修延袤七里濠隨城廣闢爲四門南文明東豐阜西太  
和北永安設水門于南 國初爲明季舊臣所據順治八年  
固山金汝礪等平之仍徙其民康熙二十三年展復海界  
特賜名定海山二十六年仍置定海縣曹志歷代治縣官制并  
賢令傳詳郡邑志

### 蘇東坡送馮判官之昌國詩

斬蛟將軍飛上天十年海水生紅烟驚濤怒浪盡壁立樓櫓  
萬艘屯戰船蘭山搖動秀山舞小白桃花半吞吐鴟夷不裹

壯士尸白日貔貅雄帥府長鯨東來驅海鱗天吳九首龜六  
眸鋸牙鑿齒爛如雪屠殺小民如有仇春雷一震海帖伏龍  
變海魚安海族魚鹽生計稍得蕪職貢重修遠島服判官家  
世忠孝門獨松節士之奇孫經綸手段飽周孔豈與弓馬同  
等倫晝窮經史夜兵律麟角鳳毛多異質直將仁義化笞撻  
羞與奸賊競刀筆吾聞判官昔佐元戎幕三軍進退出籌度  
使移輜畧事刑名坐使剽遊歸禮樂鳳皇池麟麒閣酬德報  
功殊不薄九天雨露聖恩深萬里扶搖雲外廓

### 定海縣學

學在唐無可考宋熙寧八年縣令張憲文建于城東百餘步  
淳熙十六年令王阮徙于縣南芙蓉洲後令錢棣新之嘉定

### 四明談助

#### 卷四十六

二十二

十六年令趙大忠重修郡人袁燮爲之記淳祐六年令沈壑  
重建大成殿元泰定元年知州韓搏重修而廣之郡人袁桷  
爲之序明洪武二十年學隨縣廢附于定海縣 國朝康熙  
二十六年設縣建學知縣周聖化卜地于縣治東規模初具  
至四十二年始克鳩工修整 文廟 啓聖宮兩廡鑿泮  
池駕石梁易櫺星門以石建博士公署四十八年八月大風  
雨傾圮殆盡五十五年知縣曹秉仁捐俸重修曹志歷代養士  
科條并賢師儒傳俱詳郡邑志

### 總兵府

在鎮鰲山下中營在東北右營在西左營在州衙山城東南  
隅有平阜特起



唐宋間簿尉分治于此因名州衙山

曹志

昌國舊學

昌國州重修學記

清容居士集

青社韓侯蒞是州踰年顧瞻學宮頽圯日至喟然歎曰化民成俗必自學始爰相厥攸鉤稽負逋治其島租墾其閒田完整是先泰定元年十月甲子役興用工二千有八百計緡錢二千有五百匠石日食之費則諸生欣輸以佐于是殿堂門廡齋庖池徑咸得脩具謂桷由翰苑歸俾記其事桷嘗聞之先儒以明理爲綱領譏詆漢唐不少假濂洛之說盛行誠敬忠恕毫分縷析一以體用知行概而伸之由是髫鬣之童悉能誦習高視闊步轉相傳授禮樂刑政之具訟獄兵甲之實

四明談助

卷四十六

二十三

悉有所不講哆口避席謝非所急言詞之不工則曰吾何以華藻爲哉考覈之不精則曰吾何以援据爲哉吾唯理是先惟一是貫科舉承踵駸駸乎魏晉之清談彊宇之南北不接乎視聽馴至社亡求其授命死事率非昔時言性理之士後之學者寧勿置論而循其故習者哉昌國惟是明海中州士之興起自紹熙始著樓宣獻公袁正獻公楊文元公尚書深寧王公嘗記其建學論堂之本始揚雄有言曰百川學海而至于海善喻者也首之以訓詁之精次及夫名物度數之密由小成至于大成非積年不能以至周官鄉三物之教詎止執一而以爲傳道之要殆不可也委流安行由蹇而達訖歸于海學之功也侯名搏字仲舉旣興其學乃復儒役以爲大

比之勸學之士子寧不自勵敢執筆以俟是役也州之長某州同知黃棟孫判官張信吏目陳益學正孫恕皆叶贊其事泰定二年二月癸卯具官袁桷記

翁洲書院

節錄鮎埼亭集記

應叅政葺芷由昌國遷鄞其貴也建翁洲書院于故居以興起後進穆陵賜御書以榜之元時以昌國爲州書院置山長叅政之孫全軒領之因祀葺芷于中而令其子蘭坡附焉其後又增祀全軒詳見應奎翁碑記中明時以倭難廢昌國隸定海書院亦圯今昌國復置縣改定海曰鎮海而以昌國稱定海于是復立翁洲書院嘗攷穆陵之時甬東書院實與翁洲並置甬東出于安晚其與葺芷皆迂齋之徒也故二公皆

四明談助

卷四十六

二十四

以文章名全軒亦熟于典故原夫書院之立將使學者從事于其本先立德而後立言則昌國之先師當更自葺芷而上之吾聞宋開禧中徐都曹恭先者昌國人也其任福建提舉勘定黃勇之難所至莅事精勤而操守介潔出其緒餘爲文詞亦超出流輩蓋都曹受業袁正獻公之門爲高弟蒙齋昆弟俱推服之故其學爲有本而同里有許布衣止齋受業楊文元公終身不仕以孝義倡鄉閭累徵不赴然則昌國之先師其當推二公也審矣諸生幸生文明之世誠能從事其本如二公之得統于儒林而又以應氏多聞多見之功潤色之有德有言且將升聖人之堂豈僅爲海外之倡而已哉都曹名愿布衣名孚其時昌國儒者尚有朱進士介魏布衣桀皆

爲楊袁之學者亦應得附祀

明廢昌國隸定海卽今之鎮海縣也故名賢傳俱入于鎮海近代有鄭十三孝子奉父逃倭難並爲倭所殺事見曹志李道宗遊庠後尋父至甘肅竟得團聚還鄉亦見曹志

阮芸臺定香亭筆談定海李巽占有孝行嘗授徒于某姓不食其晚餐蓋家貧歸侍其母同食番薯不忍在館獨御稻肉也又嘗受富家課子之聘旣而知友人挾權力謀奪乃固辭之終就其館穀之儉者其他行類此余曰此眞士也以孝廉方正薦之焦里堂循有番薯吟一章紀其事云母食米兒食薯母心不豫母食薯兒食米兒能不泣涕海水洶洶浪拍天中有斯人行獨賢使君與金謝不受無名得此身之咎使君

四明談助

卷四十六

二十五

曰汝勿却姑買市中珍歸爲賢母樂李生叩頭納金去兩眼紛紛淚如雨

下詳城中古蹟詩歌

御書亭

在儒學內 聖祖仁皇帝御書定海山三字知縣繆燧刻石

曹志

文昌宮

在昌國舊學之側宋咸淳間建元至元間因道隆觀廢爲寺遂以三清像寓焉成化志

芙蓉洲

宋昌國縣丞廳之南環以芰荷舊名清遠一名冰壺宋縣令

王阮徙建學宮于此明時猶植芙蓉隱士脫翔有詩今爲營署曹志卽衙山左營

元達魯花赤帖侯祠

勾餘土音甬上雜歌

詩話高昌帖木兒守昌國死方氏之難最烈王逢原有帖侯歌予嘗欲建殘元三仁祠一爲王學錄剛甫一爲陳大令文昭其一則公也

浙東三郡

明台溫

亦巖險方家軍忽席捲心傷沿海諸元師開門揖盜交籥管烈丈夫高昌公翁洲彈丸之提封百戰不折嬰凶鋒何人勸我徐圖曹柯功我敗而走世莫容握節而死乃我分怒潮爲之生赤暈吁嗟是時若有援兵來詎教睢陽

四明談助

卷四十六

二十六

城隍一網盡元季勾餘有三仁元史誰爲表沉淪前乎公王學錄分守鄞江城折衝鼠輩敢登陸一自解官去飛矢奄集大吏屋後乎公陳長官獨據慈水城大罵賊曹眞詐諛遂遭蹈海厄岱山雪浪吞寒毡三仁角立且鼎撐一洗勾餘降臣穢德腥我今作歌補史竄高山長水溯精靈

狀元橋

城東南市中狀元橋未知所自邑人張信適生其地洪武二十七年信果狀元及第始符橋名或云紹熙三年令王阮建刻其兩旁石欄云人從橋上行狀元此時生遂以名橋志

舟山宮井

鮎埼亭集碑記

舟山何以有宮蓋明亡以後監國魯王一旅居焉故自稱曰

宮也宮之井何以傳志監國元妃陳氏死節地也予攷甲申北都之難熹廟烈廟二妃死之其時文武殉難諸家新樂侯劉公眷屬最多而劉文正公馬文忠公汪文烈公陳忠愍公成金兩忠毅公其母若妻若妾皆有死者其家居聞訃自裁則王節愍公妻說者皆以爲中宮陰教之隆致之也然是猶澗槃遼葛之所聚舟山彈丸一區耳辛卯之役元妃死之其文武殉難諸家亦有若定西侯張公眷屬最多而閣部張公尙書李公朱公兵曹李公都閩吳公之家死者不一其家居聞訃自裁則給事董公妻夫孰非笄珈大節所感召與元妃爲吾寧之鄞縣人居鄭丞相府大池之北其女兒歸于吾家僉事府君監國次于會稽張妃主宮政而妃以丙戌春入宮

會西陵失守監國自江入海保定伯毛有倫扈宮眷自蛟關出期會于舟山道蓬張國柱亂兵殺掠擁張妃去妃在副舟中急令舟人鼓棹突前追兵不及伏荒島數日飄泊至舟山監國已入閩旁皇無所歸吏部尙書張肯堂遣人護之得達長垣監國見之流涕始進冊爲元妃在海上者三年己丑黃斌卿伏誅始復入舟山辛卯 大兵三道入海監國以蛟關未能猝渡親帥師搗松江以牽其勢蕩胡伯阮進居守敗死大兵直抵城下安洋將軍劉世勳議分兵先送宮眷然後背城一戰元妃傳諭詞曰將軍意良厚然懼爲奸人所賣則張妃之續也願得死此淨土乃止城陷元妃整簪服北向拜謝投井而死義陽王妃杜氏宮娥張氏從焉錦衣衛指揮王相

內臣劉朝共掌宮事歎曰眞國母也豈可使其遺骸爲亂兵所窺相舁巨石填井平之卽共刎其旁而死董戶部守諭爲作宮井篇哭之乙未英義伯阮駿再下舟山訪得妃死狀卽其井封之立碑致祭而表言于監國加諡貞妃丙申舟山又陷其碑被仆嗚呼天下之善惡一也景陽之辱高潁正法于青谿不可以爲暴則舟山之烈雖經易代而表章不可以爲嫌當妃未死嘗遣間使至中土寄書訊其女兒歷叙蛟關之掠長垣之困琅琦之潰健跳之圍操尺組而待命者不知凡幾然到頭終擬一死以完皎然之軀其節素定如此向使當時史局諸臣達之興王之前豈有不動色驚歎附之二后傳中者奈何并此不食之泥湮沒恐後是皆不知聖朝旌

四明談助

卷四十六

二十八

勵幽冥之盛者也嗚呼翁洲卽前宋之厓山也况元妃爲鄞產是尤吾鄉所最有光者宮可亡井不可沒矣乃議爲勒石而附董戶部之詩以當些詞

寓生居雪交亭

節錄鮚埼亭集記

前閣部華亭張公鯢淵之在翁洲也築寓生居于其廡舍之右蓋故叅戎之圃也其曰寓生取本艸續斷之字寓木也公嘗自爲之記言寒暑再易而圃始成則在己丑之歲乎先是思文已亡監國方在閩中公播蕩于翁洲以此寫其無聊迨翁洲爲行在公以首揆入直遷居民舍而以圃居王公之遊息于此亦無多時雖欲以是居爲止水而不克吾聞公遷居之後有雪交亭左右舊植一梅一梨其花開相接最爲公所

賞玩因築亭于是焉及其死所卽是亭也亭之外多茶多黃揚多竹而尤多秋色陶甘霖宋菊齋先贈公皆嘗以詩與公相酬今所謂寓生居者復爲鎮將之圃曲池危石依然無恙而無能道公之舊者至于雪交亭之名黃都御史梨洲愛之嘗以署其亭于姚江高兵部檗菴亦愛之嘗以署其亭于鄞故其佳話尙傳播于浙東好事者之口又聞公孫茂滋難後歸華亭揭寓生之題以題其廬不忘祖也予之爲此記也以補翁洲之掌故使圖經有攷焉

董次公續九歌悲舟山也

錄二首

### 宮井

舟山旣破魯元妃陳氏宮嬪張氏義陽王妃杜氏投井

### 四明談助

#### 卷四十六

二十九

死無一受辱者真足有光史冊矣內相劉朝錦衣衛王

相昇巨石填井以滅其迹乃自刎于井旁

元妃吾鄞小江里人也

吾欲挽天孫百尺之白練兮爲蒞拭此胭脂痕褱衣褕翟入地兮飲痛于九原今已矣兮蒼蠅無聲安得日御兮朝至尊君朝賦壺餐兮蒞夕而賦烏鳶歲大稔其荼苦兮采葛采葛含奇冤今已矣兮梧花雨滴落且繁銀床夜半兮依離魂君爲國恤兮遵海而遁蒞獨何心兮戀此故宮羞景陽之辱井兮二八飛香繞齒寒痛昇石以滅迹兮死者不朽生何以自存乃齒劍以覆井兮陰燐負壑痛狐猿耿正氣于掖庭兮忠智締結捐頭顱宦者四星爭光兮亦何媿勃貂之與管蘓淬湛盧之颯颯兮飲飛失色動地呼顧爲厲鬼以被此不祥兮

海雲幽咽冥蒼烏

雪交

張鯢淵先生自閩歸舟山于所居築小亭命名雪交每語同志曰此吾死所也及城破先生書絕命詞于襟虛名廿載著人間晚節空勞學圃閒漫賦歸來慚靖節聊存正氣學文山君恩未報徒憂瘁臣道無虧在克艱傳與千秋青史筆衣冠二字莫輕刪書畢卽具服向西拜哭二祖先帝冢婦沈羣姬周方姜畢姐孫女茂漪以次投繯門下士蘓兆人先縊于雪交亭公舉酒三爵酹而拜之乃自縊僕張俊僕妻彭歡爭死之方公之至舟山也公之中軍汝應元祝髮于普陀卽行誠也與公訣曰

四明談助

卷四十六

三十

相公死難者也應元收骸骨撫孤者也至辛卯語七年矣公死應元走哭挺身白當事願抱公骨而葬之然後就戮當事者曲赦焉及中軍林志燦與其弟桂負孤孫茂滋逃遇應元爲畫奇策卒得以生當事者復置茂滋于獄應元又走告急于諭偕陸子春明力救之獲全焉與應元左右護滋者宋龍子猶氏也周旋茂滋出獄卽薙髮長往豈非千古有心人耶

危亭孤壯兮雪交命名忠魂恍懾兮夙夜不遑子遠把臂於止水兮文節頡頏于從容之堂婦姬羣僕激昂爭死兮酌酒三爵服蘇君之倔強書襟鐵筆兮字肅秋霜屬後之信史兮莫刪冠裳壯汝之毅烈兮哭故君於鋒刃之鏗曰斂屍而後



就戮兮王修朱瑒古之良母使田橫之客笑人兮滄洲恨滿  
悲白楊燕飛梁而啣土兮碑墮泪于路旁偕子猶以翼孤兮  
脫罾繳于羊腸式趙玉之賢武兮呂琦之死而復生吾今而  
令嬰曰兮淒風肆萃生寒香

哭舟山死難諸賢

俱死于辛卯九月初二日諭作九歌七哀淚痕透紙因  
悲海上何多忠臣烈女也稽靖難之變貳卿名員自當  
報國卽諸生布衣戍卒皂隸及閨闈弱息咸慷慨赴死  
此高皇帝生成培養之盛今何以得此于海上耶偉哉  
夫以宋之將亡也景炎崩于恩州祥興國于巨艘而張  
少保陸樞密猶系一絲于九鼎况我明決不至此極諸

四明談助

卷四十六

三十一

公之才之志又何不可從六龍浮閩粵以隱忍自惜其  
有用之身而必如莫敖大心深入吳軍斷頭決腹一瞑  
而萬世不視也良亦悲夫昔黃布衣之弔鉞也其詩曰  
九辨不回哀郢志三年難奪采薇心此猶我明一家事  
也尚謹嚴若此則諸公之凜凜于二姓二心之防者豈  
爲過哉諭謹書其名其官其氏其地俾後之作史者知  
所考焉錦衣衛王相內宮監劉朝北京人戶部主事林  
瑛閩人兵部主事李開國臨山衛世襲開國母某氏兵  
科董志寧吏科楊思任鄞人通政司鄭遵儉禮部主事  
董元紹興人工部主事顧宗堯江用楫顧玠吳人兵部  
主事王璽北京人以上六公同縊于明倫堂張定西名

振之弟名甲名揚叅謀顧明楫順天府人母太夫人范氏夫人馬氏甲揚之妻某某氏闔門舉火自焚張大學士肯堂暨豕婦沈氏妾周氏方氏姜氏畢姐孫女茂漪僕張俊僕妻彭歡隨征守備吳士俊閩人或縊或赴井一門爭死烈女某氏惜不能問其名姓城破兵欲驅之走女坐地厲聲曰生于舟山死于舟山兵剝衣鞭背血流滿身決不動百慘俱備而後殺之普陀三元殿僧敬中云自來烈女無復見有如此者予已竟爲我明悲尤爲我明幸亟濡筆以哭之予漏于聞見之外者望之有心人拾遺焉

四明談助

卷四十六

三十二

海風爲爾動悲鳴凍雪淒冰哭野橫豫讓死名甘伏劍聶嫫驚市獨輕生小朝廷足夔龍翼大丈夫羞妾婦行回首高皇英憤甚諸賢怒氣亦難平

定邑爲全郡水口環邑皆山水向西南流轉東出沈家門茲詳近護脉附城沿海諸山于後

關山

城南二里圓峯特峙爲縣治內案按翁洲三面阻山俱自北而東而西東西之山各至海而盡其南海外皆有山而內無別山故樹坊表之曰東南第一關上有洋山廟有烽堠今廢

曹志

觀山

城東南半里宋建道隆觀于其下故名明倭寇汪直降建受

降亭總制胡宗憲總兵盧鏜皆有詩并建文筆塔于其上按嘉靖郡志卽指爲舟山曹志據寶慶志圖觀在舟山道頭待潮亭之西觀北有塔院再北爲昌國縣學

### 道隆觀

昌國城南一里原東岳祠宋宣和間守臣樓昇請今額元至元間道士陳可與祝髮爲僧遂改爲寺至大四年道士蔣明善求直于有司延祐二年復爲觀成化志

建爻中金人追高宗至舟山登岸斫道隆觀柱柱忽流血金人畏而遁去高宗得免後史彌遠題詞觀中曰試倚闌干春欲暮桃花點點胭脂破故鄉凝望水雲迷數堆青玉案千頃碧琉璃我本清都閒散客蓬萊未是幽奇明朝歸去鶴齊飛

### 四明談助

#### 卷四十六

三十三

三山來縹緲海運到天池程篁墩集

建爻航海之役張俊旣戰而棄鄞兀术入之卽日集賈舟募瀕海之漁者爲向導將遂犯蹕而風濤稽天不得進兀术怒躬命巨艘張帆徑前風益猛自度不習舟楫旣舞舷側窘懼欲却而未脫諸口也遙望大洋中隱隱一山顧問海師此何所曰陽山兀术慨然歎曰昔唐斥境至于陰山吾得至此足矣遂下令返棹其日御舟將如館頭亦遏于風不爾幾殆蓋天褫其魄而開中興云程史

勾餘土音擬薤露詞

道隆觀 孫閣學旅舍

七百年前觀中柱丹心流血空中雨驚倒完顏棄甲去七百

年後柱非昔猶仗金鰲呵護力老夫病中噓殘息朔風力足震不周柱乎柱乎砥中流老夫雙淚與血侔莫令完顏過埼頭

詩話道隆觀在翁洲宋高宗爲金帥所追至此金人以戈擊柱柱血橫流金人驚仆七百年後姚江閣部孫公嘉績從亡病卒于此 孫公傳見後

### 定海關港

城南三里哨船彙泊此處進港卽南道頭定海山渡定在東北鎮處西南相距約百六十里自鎮至定舟行過招寶山至虎蹲再數里爲小港俗名拆船灣謂風難避船過山崖有擊撞之患過此十數里至蛟門海中三峯並峙山東怒濤水勢

### 四明談助

#### 卷四十六

三十四

湍急舟從中行雖風恬浪靜之日亦多戒心蛟川天險自古記之洵不誣也過此折而東向數十里過金塘而入橫水洋向東北行約四十餘里抵螺頭橫水洋者潮長自南而北潮退則自北而南舟將橫渡故名橫水其險亦不在小港蛟門之下自螺頭向東南十餘里至寡婦礁復轉而稍東七八里至竹山復向東北十里至定海山渡

詳曹志

### 南雷頭山

縣東南七里高二里許外臨海洋舟由十六門沈家門進出必取路于此今設臺一座名青壘以資瞭望

曹志

### 九節龍潭

縣東五里田塍間昔有人汲水得一鰻鱓之九段烹諸釜俄

頃不見翊日復汲于潭其鰻洋洋而九節顯然于是人異之  
早曠往禱焉成化志

### 甬東山

縣東十里史記所稱置吳王甬勾東地蓋東南之主山也曹志

以上附城山川俱屬甬東畧翁洲懸海中分十六畧自北而東北至東南有干礮臯洩白泉北潭大展舵畧蘆花洞畧吳榭甬東等名自北而西北至西南有馬畧小沙大沙岑港紫微鹽倉等名不盡錄畧載數條于下

### 萬壽寺

昌國東北三十里名永福宋建隆元年建治平元年賜今額寺有秋蓀綠葉紫莖生于山名萬壽香成化志

### 四明談助

#### 卷四十六

三十五

勾餘土音賦四明萬壽蓀

詩話翁洲萬壽寺秋蓀最盛宋人呼爲萬壽香香以瘦而清每嫌肥者癡蘭蓀蕙之瘦蕙視蓀猶肥其肥幸不癡未若瘦者奇翁洲萬壽香時復見離離

### 灌門山 黃大洋

縣東北三十里山之巔有龍潭北臨大海名爲黃大洋狂瀾洶湧最爲險要曹志

### 灌門砥柱

灌門山下有龍窟土人名爲干礮潭有大石懸峙中流屹然砥柱望之如人拱立狀潮水迴旋衝激若鼎沸可畏舟人俟晴日潮平投物以殺其怒方敢過此風雨將發濤鳴如雷聲

聞百里旱時具鐵篆投之雨隨至

曹志

吳家山

縣東二十七里明倭曾據此山五百餘日把總張四維率麻

陽兵除夕破之下有畧名吳大畧

曹志

翁山

一名翁洲縣東三十里徐偃王所居也今城址猶存 乾道

間耕者于其下得銅鼎一無足而有耳耳亦不穿中可容斗

餘而底之埃墨猶在以歸進士陳節謂煉丹之遺器

寶慶志

或

云翁洲以葛仙翁而名

徐偃王廟

在昌國縣東地名翁浦俗呼爲城隍頭十道四蕃志云徐偃

四明談助

卷四十六

三十六

王城翁洲以居其址今存按史載偃王之敗北走彭城武原

東山下以死疑非此海中而韓文公爲衢州廟碑乃記或者

之言曰偃王之逃戰不之彭城之越城之隅棄玉几研于會

稽之水則十道四蕃志或可信矣

寶慶志

舟山

翁洲西南狀如覆舟船棹往來于此維泊

成化志

舟山獲白鹿

嘉靖三十六年定海縣舟山地方獲白鹿于山中形色殊異

時總督胡宗憲方提兵茲土有司以告表獻之

曹志

鼓吹峯

在翁浦中其山之陰曰戰洋曰馬畧其對卽偃王祠也世傳

孫恩之竄亦在此按恩自其叔泰以罪誅卽竄海島史雖不指島名以地攷之蓋今定海昌國之間虎蹲蛟門之側也今之遺址爲偃王爲恩未可知也寶慶志山巔平坦可容數百人值風雨晦冥隱隱有鼓吹聲故居人以此名之曹志

### 金旗山

縣東二十七里北卽戰洋相傳偃王建金旗于此故名再東十里有陣壘山偃王列戰處有北戰洋磨刀橋皆其址也曹志

### 沈家門山

縣東南九十里內障蘆花等數大壘外通蓮花洋最爲要地明嘉靖間指揮劉恩伏兵此山以敗普陀之倭後設水寨

國朝雍正八年移寶陀巡檢司駐其地曹志

### 四明談助

#### 卷四十六

三十七

以上錄附邑左旋山川至甬東壘止海南普陀諸山係東四明分支象山脈已見四十四卷

### 烟墩山

縣西北四十三里山臨大洋岱秀在望設烟墩以瞭又有沙垓山西臨大洋明把總王延廩敗倭于此

### 大小竹嶼山

俱縣西北五十里近有西堠門桃天門爲北洋必由之路曹志

### 雙鴉山

縣西二十五里有木城舊址曹志近有長料杓雙獅等山

### 平巖山

縣西南十五里與懸海洋螺山對峙上有炮臺又鹿頸山有

烟墩曹志

以上錄附邑右旋山川至鹽倉畧止明季殉節名宦名賢錄于後

故閣學孫忠襄公嘉績

字碩膚燭湖先生應時之後燭湖宋乾淳間碩儒也公大學士文恭公如游之孫工部郎中樽之子先世自月峯尚書喜藏四部至是盡歸于公公不以膏粱廢攻苦成崇禎丁丑進士授兵部主事戊寅大兵薄都城傅城閉壘莫能測其進止公曰此不難知當俟後隊至卽南下耳盍乘其未集而急攻之又三日大兵果挾西戎六萬由青山口卽日拔營而南于是以公知兵不次進職方郎中甲申

四明談助

卷四十六

三十八

北都亡赧王起公爲九江道僉事未上而南京又亡先是公之同里吏科都給事中熊公汝霖聞大兵將至杭奔告潞王欲發羅木營兵拒之潞王已議迎降不聽熊公歸見劉忠正公宗周而泣劉公歎曰吾已絕粒待死諸公倘有能爲田氏卽墨之守者天下事未可知也熊公歸而商于公然計無所出署餘姚縣王元如以治馳道不勉扶役夫役夫反歐元如攘攘不已公聞之遽率健兒鳴金鼓突入縣署斬元如以徇乃急邀熊公出治軍分爲兩營公主左熊公主右時乙酉閏六月初九日也浙東列郡人情觀望莫敢先發至是遂皆響應會稽章公正宸以鄭公遵謙等應之次日鄞錢公肅樂應之又次日慈谿沈公宸荃應



之又次日紹之屬縣皆應之乃迎監國魯王于天台諸軍會于江上張公國維指公言曰此真五世相韓之子弟也王加公都察院右僉都御史督師瓜里時諸軍分汛江上人呼爲六家軍而公營于瓜里之龍王堂前公至江上荐故御史王公正中知餘姚縣事又請許其募鄉兵以助防守薦章欽臣爲大將使治火器江上人呼爲火攻營同里黃公宗羲以義兵數百人從公薦之爲御史王加公兵部右侍郎兼都御史督師如故阮大鍼曠方國安疏糾東林餘孽公與林公時對沈公履祥等並豫焉公遂乞休不許公之令欽臣治火器也製作甚精旣力陳西渡之策方國安王之仁二軍不與同心至是師日老餉日竭宗羲言于

公曰願得以此軍獨出必得當以報公公喜命欽臣汰其不中步伐者熊公亦簡軍中精銳合之得三千人以正中副之于是公定議由海道西渡取海寧海鹽一帶而揚聲由盛嶺出軍五月王加公兵部尚書兼東閣大學士督師如故公以老營駐龍王堂前而宗羲等潛師出潭山會太僕陳公潛夫軍議取沿海諸縣浙西震動公蒿目望之俟捷音至欲令鄭公遵謙等夾攻杭州而國安七條沙之軍已潰列戍四竄公急還會稽則王已登舟而去乃亦航海入翁洲以觀變時公已疽發于背至翁洲疾篤問從者曰此何地也從者曰道隆觀也公歎曰吾聞建炎時宋高宗至此金人以刀斫柱血流如雨金人驚仆而宋提領張公

裕以大舶擊之今五百年矣因唏噓泣下錢公已先在翁來視疾相向哭公謂子延齡曰倘聞王所在宜亟從之語畢而卒延齡藁葬公于蘆花畧康熙乙丑延齡子訥始渡海扶歸姚江葬于燭湖

### 大學士熊公汝霖

字雨殷世居餘姚之天花街登崇禎辛未進士考選戶科給事中後以降謫而去南渡起補原官轉吏科會稽之守畫江而營公之意欲令諸帥畢渡沉舟破釜爲不返之計如其不濟則亦八千子弟豈復東還五百島人不脫劍鏑而已身提孤旅不滿千人從小鹽渡江扎喬司倡率羣帥而皆契需觀望無一應者公進至海寧集其父老豪傑激

### 四明談助

#### 卷四十六

四十

揚忠義詞酸泪血聞者莫不感動旅拜轅門且萬人別行伍分汛地以本邑進士俞元良司餉指揮姜國臣主兵浙西塵起沿海烽燃一時號之爲熊兵公大小數十戰親臨矢石累經覆沒意氣不爲之少衰加兵部右侍郎兼左副都御史總督義師無何而閩使劉中藻至欲以江上之師受其約束行朝洶洶且議開讀之禮魯王亦將退就藩服公獨持不可言主上原無利天下之意唐藩亦無坐登大寶之理有功者王定論不磨若我兵能復杭城便是中興一半根脚此時主上早正大號已是有名較之閩中乘時擁戴奄有閩越者規局更難例論千秋萬世公道猶存若其不能而使閩兵克復武林直趨建業功之所在誰當與

爭此時方議迎詔亦未爲晚自公此議出人心始定閩使  
始返丙戌六月朔浙河兵潰公扈監國由海道至閩而隆  
武走死郡縣已皆附降王以公爲東閣大學士會兵于長  
垣分道攻取先後得三府一州二十七縣戊子王在閩安  
鎮時國事皆專于鄭彩彩橫暴公每折之以禮彩與定遠  
伯周瑞交惡公票擬恒右瑞彩積恨之旣而彩與義興伯  
鄭遵謙爭商舶常恐謙之襲已公自閩安至琅琦休沐守  
琅琦者彩之裨將李茂也與公奴子爭口元夕熊鄭兩家  
同郡相問遺茂卽以合謀告彩公遂爲彩所害并其幼子  
投海中公報國之心九裂不恨然吳鉤枉矢飛火狂濤皆  
鑒公之忠全軀橫海之鯨而受制于螻蟻謂之何哉

詳南雷文

四明談助

卷四十六

四十一

定行狀

勾餘土音擬薤露詞

強死海上濤 鄭通政哭兄

我兄起江東赤手斬殷通小壘數百戰凜凜想英風從亡  
海上來此志固未灰崎嶇牡蠣灘旌纛爲重開不死靴中  
刀強死海上濤憑誰飛長劍爲我殲鴟鴞

詩話義興伯鄭公 遵謙 爲鄭彩所橫屠其弟通政遵儉跳

入翁洲作哭兄詩極其酸楚 通政紹興人

沈都御史廷揚

字季明一字五梅自少喜爲有用之學不屑屑章句由蘓  
州崇明學諸生入太學崇禎九年丙子河道累決漕運艱

阻思陵患之公應詔上書言海運可復思陵以爲然于是試公戶部主事一切船隻水手皆自行辦理詔漕撫以漕米二萬石予之公奉命出相視山東膠州與南岸相對者爲廟灣公以廟灣下船由淮河口出七晝夜抵天津馳疏以聞思陵大喜于是定議每歲春秋二運增米至二十萬石船隻水手之費仍委公任之而以運到之日給其費如內漕之半公歷官主事員外郎中督運凡七年癸未加內府光祿寺少卿仍督運江北諸軍時廷臣或請由海道出師北伐公聞歎曰誠使是策得用吾願爲前軍以啓路赧王稱制詔公以原官督餉饋不果行 大兵下江南公航海入浙監國加以侍郎兼右僉都御史總督浙直欲令公由海道以窺三吳時田仰爲相忌公公乃之翁洲欲以翁洲將黃斌卿之兵入吳時諸軍無餉競以剽掠爲事公謂斌卿曰公以恢復爲名今所爲如此是賊也將軍其戒之斌卿是公言公乃爲定履畝勸輸之法而軍士不敢復抄掠其後斌卿以不迎監國被誅而翁洲之人猶念之皆公一言之力也丁亥松江提督吳勝兆送款于翁洲斌卿猶豫不欲應之公曰事機之來間不容髮奈何坐而失之定西侯張名振慨然請行邀公爲導公曰兵至必以崇明爲駐劄地禁打糧然後可名振許之至崇明而食盡名振違前約打糧泊舟鹿苑五更颶風大作舟自相擊軍士溺死者過半 大兵逆之岸上大呼薙髮者不死名振與張都

御史煌言馮都御史京第皆雜降軍中逸去公歎曰風波如此其天意耶我當以一死報國乃謂大兵曰我都御史也汝輩當解我之南京公至江寧經畧洪承疇使人說公曰公但薙髮當有大用公曰誰使汝來者曰洪經畧也公曰經畧以松山之難死先帝賜祭十三壇建祠都下安得尚有其人此唐子也承疇知不可屈乃行刑部下官及公從子甲皆死之而公之親兵六百人斬于婁門無一降者時以比田橫之士焉

詳鮚埼亭集本傳

### 大學士張公肯堂

字載寧別號鯢淵江南華亭人也公以都御史巡撫閩中當江寧失守閩中文武奉唐王監國公輔王銳意中興而

### 四明談助

#### 卷四十六

四十三

鄭芝龍暗懷異志反惡公之所爲及芝龍引大兵追王也公痛哭誓不欲生時公屯鷺門其旁爲東石卽芝龍所居也會周鶴芝軍至與公謀出師破海口諸城大兵勢盛不能抗遂由閩入浙至翁洲而翁之總兵官黃斌卿者素無遠畧但謀厚自封殖以偷安海外公知勢不可爲遂栽花種竹于圃中作寓生居記以見志無何而張名振等奉魯王至公力勸斌卿奉迎不聽諸軍問罪于斌卿斌卿乃死王入翁洲以公爲大學士輔政公虛所居邸以爲王宮張名振之殺王朝先也公力解之而不能得國事盡歸名振公亦不得豫則恨憤不食咄咄終日築雪交亭于邸中夾以一梅一梨開花則兩頭相接嘗歎謂門下蘓儀部

兆人汝都督應元曰此吾止水也兆人對曰公死兆人必不獨生公撫其孫茂滋顧應元曰一綫之托其在君乎應元曰諾于是應元披緇赴補陀而兆人始終從公又二年而大兵至張名振奉王搗吳淞思以牽制大兵而以公爲留守公遣蕩湖伯阮進邀擊大洋風反師燿大兵直抵城下安洋將軍劉世勳固守力竭城陷先一夕少保禮部尚書吳公鍾巒至作永訣詞因集家屬曰無爲人辱及晨諸姬方氏周氏畢氏姜氏豕婦沈氏女孫茂漪俱自盡諸婦婢多有從死者公謂茂滋曰汝不可死其速去公投環于雪交亭蘓儀部兆人死于廡下順治八年辛卯九月初二日也茂滋狂號欲共死中軍將林志燦林桂掖之

行甫出門而亂兵入茂滋脫去志燦桂等以格鬪死守脩吳士俊家人張俊婦彭歡皆死茂滋尋被執其得生也賴應元與陸公宇燦董公守諭德偁諸人救之以免蓋自大兵南下所向不血刃其以一郡抗命者曰贛曰金華其以一縣抗命者曰江陰至翁洲不過孤島如黑子而竟相支柱多所夷傷至使諸將皆以爲南下所未有于二京殆有光焉則元老之所以報國者良無媿矣公死之次日應元乞諸大將舁公尸出城鄞之諸生聞性道與定之諸生等募鄉民舁公眷屬及賓從等尸出城然倉卒無所得棺乃以火化之貯以三大甕其一貯公骨其一貯公四姬一婦一女孫諸婢骨其一貯儀部以下骨葬于補陀之茶山

茶山者應元所築寶稱庵以避人者也補陀爲大士道場  
顧儒者所弗信得公之骨葬焉海島爲有光矣

結埼亭集  
神道碑

又跋張茂滋餘生錄并汝都督出家詩俱見第十六卷宋  
菊齋寓居下

錢蟄庵光繡輓張相國殉難翁洲

黑風崩城吹海立修鯨跳舞妖蛟泣此日冠裳等貝球

公用

絕命詞  
中語 斂手陽侯爲拱揖絕島經營五載餘誰言成旅非

良圖臣心未灰臣力竭尺組畢命安躊躇生孔明死秀夫  
幸與不幸斯人徒不須精衛銜微木大海雖大行當枯

劉將軍世勛

大兵之下江南也望風而靡所向幾不血刃其最難下者

四明談助

卷四十六

四十五

江西之贛州江南之江陰涇縣吾鄉之翁洲翁洲僅彈丸  
絕島然而殘明一綫實寄于此其關係至與厓山等斯亦  
奇矣翁洲文武死事可攷者二十七人而城守之力則劉  
公世勛一人任之爲尤烈初 大兵之分道下也定西侯  
張名振令蕩湖伯阮進邀擊于大洋以將軍城守而自奉  
王揚聲搗松江以牽制之定西甫去天忽大霧 大兵乘  
順風逕渡無知之者蕩湖急出兵用火攻而反風竟自爨  
大兵遂直抵城下將軍料簡城中步卒尚五千麾下死十  
五百居民助之乘城而守屢攻屢却八月二十八日開門  
詐降內伏大炮受降者爭先入伏發擊殺千人 大兵愈  
怒急攻然終不克先是城中別將邱元吉金允彥密約爲

內應顧不得間二十八日遂縋城而出降且言將軍嚴守狀乃再益兵九月二日大炮如蝟城雉盡壞將軍乃朝服北面望洋再拜自刎嗚呼烈矣翁洲一城之流血以將軍故而居民至今趨祀其祠恐後豈非其精忠之所感歟將軍字允之南京解褐自右榜進士監國駐師進安洋將軍平居好史籍嫻吟咏稱儒將云

結埼亭集碑文

禮部尚書吳公鍾巒  
字峻伯號稚山常州武進人崇禎甲戌進士國難後從監國至閩歷官至禮部尚書姚江黃都御史宗羲招公居四明洞天公答之曰故人有母固應言歸老生從王所在待盡而已遂退居補陀舟山師潰公曰昔者吾師高忠憲公

四明談助

卷四十六

四十六

與吾弟子李仲達死奄難吾爲詩哭之吾友馬君常死國難吾爲詩哭之吾門生錢希聲從亡而死吾爲詩哭之吾子福之倡義而死吾爲詩哭之吾老矣不及此時尋一塊乾淨土卽一旦疾病死其何以見先帝謝諸君于地下哉乃復渡海入城與張閣部肯堂訣曰吾以前途待公至文廟右廡設高座積薪其下捧先聖神位舉火自焚賦絕命詞曰只因同志催程急故遣臨行火浣衣時年七十有五僕徐甲負骨以歸

結埼亭集外編

勾餘土音擬薤露詞

洞天住

吳尚書送別

詩話稚山尚書在海外姚江黃都御史勸以歸隱四明



山中尚書歎曰君以老母故歸吾何依哉况聞四明山  
師大起亦非安枕之地也慟哭舟中而別

故人憐播遷招我住洞天豈不愛洞天有君未忍判故人  
有母故應去留我殘年窮海住行行三板船觸目成愁緒  
近聞洞天亦難依猿鶴將偕沙蟲靡送君未忍自崖返臨  
風一慟陰雲飛

兵科給事中董公志寧

字幼安殉辛卯之難傳見二十四卷武鎮坊董給事宅

吏部主事楊公思任

主事殉難翁洲見第十四卷東城楊氏下傳失

工部營繕所正戴公仲謀

一作明

四明談助

卷四十六

四十七

辛卯舟山破工部與張公肯堂吳公鍾巒同時殉難傳見  
三十五卷桃源戴氏下

錦衣衛經歷戴公爾惠

錦衣守舟山螺頭門拒戰見殺見桃源戴氏下

張忠烈公煌言翁洲行

壬辰

自從錢塘怒濤竭會稽之栖多鍛翻甬東百戶古翁洲居  
然天塹高碣石青雀黃龍似列屏蛟螭不敢波間鳴虎韞  
爭如秦婦女魚旒半是漢公卿五六年間風雲變帝子南  
巡開宮殿由來澤國仗樓船烏鬼漁人都不賤堂怡穴鬪  
幾經秋敵來飲馬滄江流共言滄海難飛越况乃北馬非  
南舟東風亦與胡兒便一夜輕帆落奔電南軍鼓死將軍

擒從此軍年罷水戰孤城聞警早登陴萬騎壓城城欲夷  
礮聲如雷矢如雨城頭甲士皆瘡痍雲梯百道凌霄起四  
顧援師無螻蟻裏瘡奮呼外宅兒誓死痛哭良家子斯時  
帝子在行間吳淞渡口凱歌旋誰知勝負無常勢明朝聞  
已破蛟關又聞巷戰戈旋倒闔城草草塗肝腦忠臣盡葬  
伯夷山烈士悉刎田橫島亦有人自重圍來向予細說令  
人哀椒塗玉葉填智井甲第珠璫掩劫灰而今人民已非  
況城郭髑髏跳號寧復肉土花新蝕遺鏃黃石苔早繡缺  
戕綠嗚呼問誰橫驅鐵兩襠翻令漢宇剪龍荒安得一劍  
掃天狼重酌椒漿慰國殤

李杲堂翁洲詞

四明談助

卷四十六

四十八

翁洲未徙前城門鳴烏聚噪萬數井水黑未幾變起翁  
山多猿家畜犬禦之火後犬奔山猿鳴滿谷所謂烏亂  
于上獸亂于下

黑雲如上海上奔白日鬼啼翁洲門烏驚百萬啄人屋腥  
風夜吹井水渾須臾大火空城起七十二島同時焚壽冷  
流光緣岸哭十家五家徙魚腹黃犬嗥嗥走山谷老猿引  
雛盡登木

同歸域

城北鎖山之原明季士大夫殉難者收葬于此題曰同歸

弔同歸域文

婁縣姚椿春木甫撰

同歸域者在定海城北二里鎖山之原舟山破時士大夫

寓此者死傷尤衆經歷喬鉢收葬于此題曰同歸歲久傾  
圮康熙間知縣繆燧出俸買石封之道光辛巳孟冬予登  
鎮海招寶山遙望昌國軍波濤澎湃洲島出沒不任悲慨  
投斯文以弔之

山遑迴兮蒼蒼雲重陰兮茫茫水浩瀚兮渺不知其所極此  
蕞爾兮奚鄉海波沸騰兮勝朝季天柱崩摧兮多士萃 眞  
人御世兮燭火退區宇混一兮見節義翁洲屈曲兮蛟關巍  
峩委心陽侯兮栖神白波依蠣灘兮明月踞鰲背兮浩歌國步  
阽危兮展轉東甌崩雲裂瀑兮寄此身爲扁舟崦嵫落日兮  
哀彼中流招手故人兮魂其來游此飼螻螿兮彼飽鱣鯪俛  
仰一笑兮聊以忘憂精衛嗥兮鬼車哭夸父有杖兮不可逐

四明談助

卷四十六

四十九

黃鵠躑躅于華表兮朱鳥悲鳴乎宰木田島五百而赴難兮  
厓山一旅而俱溺人誰無死兮視泰山鴻毛以爲失得古與  
今其一邱兮况此忠義所旁薄殿基荒蕪而傾側兮宮井淹  
穢而不食維幽靈其感通兮庶握手而無極虹旂兮霞弭前  
揚波兮後重水琅之江兮無窮盲風怪雨兮不可以止窮冬  
兮促節鬼火磷磷兮出復沒白馬兮素車朝潮兮夕汐陀羅  
荃心期斯淨土兮願相與永窳乎茲域亂曰海上喬木闕古  
春兮茲雖衆骨實孤臣兮峩峩石闕孰所表兮國殤毅魄庶  
其有保兮

下詳西大洋懸海三姑長白馬目金塘自北而西而南至

摘箸盤嶼諸山

三姑山 冽港 岑江

三姑山在昌國縣西北八百里海中冽港在縣西近金塘山

岑江在縣北近岱山

寶慶志圖

三姑都巡檢治下指使兩員一治冽港一治岑江三姑山係北洋衝要之地凡海舟自山東放洋而南欲趨浙之東西必自此分道紹興間置都巡檢寨又于岑江冽港置兩指使寨以為犄角其後三姑寨移駐冽港殊失初意嘉定七年提刑程覃攝守請于朝以三寨土軍聽定海水軍統制節制每歲撥二百五十人同水軍五十人各三百人出守三姑以十月朔往三月朔還授以舟船器甲給以添支錢米就軍中擇將四明談助

卷四十六

五十

長白山

縣北一百十里山下水名長白港西北近秀山岱山

曹志

馬目山

縣西北六十里山高三十餘丈周圍二十餘里泉甘土肥一名馬墓山下水名馬目港

曹志

近有裏釣大小羊大小魚等山

金塘山 葛僊峯

縣西八十里巨浸海中周圍百餘里泉甘土肥林木翳鬱山田塗蕩數萬畝洵稱沃壤棄之則反為盜賊淵藪 國朝康

熙二十七年知縣李侗詳請開墾漸次成熟畧九支山五相傳卽葛稚川陳禪師金信郎講道處嶺四街一橋五有磬二一新一舊自知縣繆燧捐修之後老磬可以不設矣志曹山中葛仙峯爲最高產桃一株花而不實猶有三仙堂遺址煉丹井久旱不涸志成

### 册子山

縣西八十里定海金塘相爲對峙中隔橫水大洋册子居中以塞北洋之水口土腴泉美人多居焉屬金塘鄉志曹

### 瀝表嘴山

縣西北約百里爲金塘之外障下卽瀝表港港門寬濶可以泊舟明王直作亂結巢于此志曹又有蘭山太平中釣外釣菜

### 四明談助

#### 卷四十六

五十一

### 花等山

### 瀝港 瀝表門

縣西八十里近金塘山明嘉靖三十五年都督盧鏜擒斬倭酋辛五郎等于瀝港瀝表門在金塘瀝表之間志曹

### 螺頭門

螺頭山在縣西南二十里山下名螺頭門從定海港出此卽橫水洋志曹曹志記橫水洋潮汛南北長退語不分明故不錄

### 大螺放光

明萬歷二十九年定海關外忽有大螺放光如月是年定海總兵夢海神求救次日午刻關上忽水湧五尺因命兵卒鳴鑼手鼓百弩齊發踰時始平說者謂龍奪螺珠得救而退云

曹志

大榭山

縣西南八十里寬廣百里土肥居民頗稠山田塗蕩數千餘

畝曹志近方懸海又有大渠小渠大茆小茆等山茆一作猫

竹山門 丁寡婦礁

內洋西南五里有竹山自縣治出此始出螺頭門丁寡婦礁

在竹山門西左茆山右螺頭亂石嶄然突起潮漲則礁没不

露舟人勿戒觸石舟壞先昌國令王與善豎石表為標記後

圯復後又廢 國朝康熙間左營游擊葉紀捐俸修豎曹志

摘箸山

即火燒門縣西南十里相傳地產白艾多蛇近有盤嶼山山

四明談助

卷四十六

五十二

勢盤旋山多田少肥瘠相半

下詳東大洋懸海衢山長塗自北而東而南至桃花六橫

等山并江南省盡山止

曹志云西南外洋與鎮象二縣接界東南外洋直達日本

無山島名目西北外洋與慈鎮二縣交界東北外洋界半

洋獅子鼠狼湖青幫福山狼岡等境

衢山

縣北三百餘里寬廣百餘里四山環聚地勢平衍宋元時稱

為沃壤與岱山統名蓬萊鄉村二曰衢山曰北界自明初遷

遣之後永行廢棄 國朝康熙二十八年請復三鄉而蓬萊

鄉止復岱山其衢山以地處險遠未經題請議復仍為禁地

曹志 舊聞堪輿家云南幹龍盡結大地在金峩以舟山爲外護  
下沙其脉自嘉興外衢山渡海來錢塘江水出橫水洋必由  
沈家門至盡山歸東海橫水洋潮汛出入所以特盛果爾則  
舟山不特爲四明門戶直爲全浙門戶矣說似近理姑存之  
十二峯

翁洲北去縣三潮其峯若巫山然成化志 在東衢山峯列十二  
森秀可觀曹志

### 衢港洋

縣北外洋一名半洋一名漢洋閩人春汛捕魚呼温黃爲南  
洋衢東爲漢洋春夏漁汛各船俱集于此不下數千計曹志

### 長塗山

### 四明談助

### 卷四十六

五十三

縣東北百七十里其麓卽東岳嘴附近岱山採捕多集于此  
長塗港在山之西南廻環周廣與南道頭兩處爲泊船第一  
地曹志

### 東霍山

翁洲東北環以大海世傳徐福至此有石棋枰修竹蒼翠風  
枝掃拂常無纖塵成化志 過西又有西霍山

### 蘭山 劍山

翁洲北巔崖嶮巖巨石巉岬爲衆山奇怪成化志 劍山險峻如  
劍故名分東西二山曹志 秀山近馬鑿已見前

句餘土音蘭秀二山弔趙參軍

詩話趙侍郎逢龍之孫觀光也鄞人而死節于定

宗卿好孫枝喪職爲下吏元政旣不綱助防申正義下吏一何微正義一何厲應憐填海鳥哀吟薤露意

石弄山

翁洲東北巖石玲瓏日光雲影透漏其中成化志旁午日光穿

射爲十六門故俗呼爲十六門山又呼爲石衙山曹志

梁鴻山

縣東六十里山頗雋秀觸處皆可賞玩舊志云晉魏以來多名賢墨跡年久率不可讀相傳梁鴻曾攜妻子避亂于此墓碣尙委于東壘之側山因得名曹志

勾餘土音賦梁鴻梁山

梁生賦罷五噫作遠遊來朝爰及孟姬來翁洲此間山水殊

四明談助

卷四十六

五十四

不惡胡爲別向姑蘓卜一邱要離乃是吳妄人擬之烈士非其流幽宮有知應不憇魂魄定當重過此地相勾留更聞巖間多墨跡晉魏題名輝貞石天風海濤千年餘漸與桑田同剝蝕癡人不解懷古心妄叅大士聽潮音頂禮膜拜不可禁高賢遺址委荒林笑我鈍根別有契梁山山上獨長吟

白沙山

縣東八十里港門卽白沙港又有烏沙門在白沙港之南曹志

馬秦山

翁洲東南山勢平行中有響巖遇陰晦則空洞有聲成化志

歇轎巖 蓮花峯

馬秦山有石平闊五丈許結庵于側往來者停憇于此與馬



秦對峙有蓮花峯三石層疊如蓮花

志成化

### 安期洞

安期先生洞在馬秦山世傳安期生隱于此因以名鄉焉

寶慶

志又有桃花山在翁洲東南世傳安期生煉丹之地嘗以醉

墨灑石成桃花紋東北有馬跡山安期生洞在焉

志成化

勾餘土音賦安期生安期鄉

始皇東遊鄧縣三十有六日驅山塞海真忽忽豈知此中大

有避秦人醉灑桃花滿石室祖龍勞攘吾弗聞到頭亦與朱

弓赤矢同滅没

謂徐偃王城

何如道人墨痕長明瑟八千子弟起

江東翻然一出說重瞳匹夫之勇不足用吾其歸逐冥飛鴻

黃石赤松紛詭怪斯人殆亦留侯輩一出一處踪跡分誰識

### 四明談助

#### 卷四十六

五十五

此中耿耿同節概笑殺燕齊方士愚如瓜之棗思津逮

### 黃侍御寓居

宋黃侍御龜年避秦檜之禍退居馬秦山勾餘土音有馬秦

山操俱見二十四卷黃侍御居第下

### 桃花山龍潭

居桃花山之腰洞口瀑布冬夏不竭欲雨先布雲霧徧罩山頂相傳明時寧旱大嵩民人延巫航海巫先行遇一洞信步直入見老嫗與一小女理髮繫紅繩以爲飾嫗曰汝從何來巫指以處叱之速回遲則禍將至巫懼急出而洞已沒矣惟見偕來者望潭拜禱有一紅頸小蚓浮水面再拜而請之舟回將及岸風雨驟至歲大有民感之請憲建宮立碑以祀

曹志

元吳萊東海古蹟記云南望桃花馬秦諸山嵌空刻露屹立  
巨浸如世疊太湖靈壁不著寸土尺樹天然可愛東南望東  
霍山山多大樹徐市蓋駐舟于此土人云自東霍轉而北行  
盡昌國北界有蓬萊山衆山四圍峙立旋繞小嶼屹如千丈  
樓臺而中處又有紫霞洞與山爲隣中畔通明方如大車之  
輿潮水一退人可入或云人不可到隱隱有神仙題墨漫不  
能辨又有山砂細沙所積海日照之有芒手攬則霏屑下漸  
成窪穴潮過又補終不少損旁有石龍角爪鱗鬣畢具蜿蜒  
跨空亘二十里舟經其下西轉別爲洋山中多大魚又北則  
爲胸山岱山石蘭山魚鹽者所聚又自北而南則爲徐偃王  
戰洋又南則爲黃公墓黃公赤刀厭虎厭不勝爲虎所食者  
四明談助

卷四十六

五十六

也

香火礁

一名分水礁與馬秦山相近土人言每歲三月內大魚揚鬣  
鼓鬣千百成羣來會于此礁之下急湍有聲震盪可畏

曹志

烏石塘

烏石塘三一在馬秦壘一在下塘頭千步砂一在桃花壘昔  
皆大洋也百年之間或卷砂以爲隄或堆石以爲塘中或膏  
腴不以人力然則滄海變桑田非虛言也

寶慶志  
紀變

六橫山

縣南六十里地廣田腴人居稀少與鎮海梅山旗頭相近山

田塗蕩都爲鎮民開墾屬安期鄉

曹志

馬蟻山

縣東南八十里再東有順母塗山皆漁民網捕之處

曹志

西四明山脉盡于翁洲東南諸山東四明山脉盡于南海  
普陀諸山中以沈家門水道爲界此四明全郡之關鍵也

馬蹟山 黃龍山

馬蹟黃龍爲江浙分界處再南爲深水洋爲盡山盡山內左  
花腦右李西山係東大洋出入之門北行達上海崇明太倉  
等處轉西進沈家門達寧郡見陳倫炯海國圖

同安陳倫炯海國聞見錄云南之海島由衢山岱山而至定  
海東南由劍山長塗而至普陀普陀直東之外出洛伽門有  
東霍山夏月賊舟亦可寄泊伺劫洋舶回棹且與盡山南北

四明談助

卷四十六

五十七

爲犄角山脚水深非加長椗纜不足以寄普陀之南自崎頭  
至昌國衛接聯內地外有韭山弔邦亦賊舟寄泊之所此皆  
寧波郡屬